

『金匱要略』

『金匱要略』元・鄧珍本

底本には、燎原書店影印本（1988年）を使用した。

『金匱要略』：元・鄧珍本

新編金匱要略方論

尚書司封郎中充秘閣校理臣 林億等詮次

晉 王叔和集

漢 張仲景述

◆臟腑經絡先後病脉證第一。

問曰。上工治未病。何也。

師曰。夫治未病者。見肝之病。知肝傳脾。當先實脾。四季脾王不受邪。即勿補之。中工不曉相傳。見肝之病。不解實脾。惟治肝也。夫肝之病。補用酸。助用焦苦。益用甘味之藥調之。酸入肝。焦苦入心。甘入脾。脾能傷腎。腎氣微弱。則水不行。水不行。則心火氣盛。則傷肺。肺被傷。則金氣不行。金氣不行。則肝氣盛。則肝自愈。此治肝補脾之要妙也。

肝虛則用此法。實則不在用之。經曰。虛虛實實。補不足損有餘。是其義也。餘藏準此。

夫人稟五常。因風氣而生長。風氣雖能生萬物。亦能害萬物。

如水能浮舟。亦能覆舟。若五臟元真通暢。人即安和。客氣邪風。中人多死。千般疾難。不越三條。一者。經絡受邪入臟腑。爲內所因也。二者。四肢九竅。血脉相傳。壅塞不通。爲外皮膚所中也。三者。房室金刃蟲獸所傷。以此詳之。病由都盡。若人能養慎。不令邪風干忤經絡。適中經絡。未流傳腑臟。即醫治之。

四肢才覺重滯。即導引吐納。鍼灸膏摩。勿令九竅閉塞。更能無犯王法。禽獸災傷。房室勿令竭乏。服食節其冷熱。苦酸辛甘。不遺形體有衰※。病則無由入其腠理。腠者。是三焦通會元真之處。爲血氣所注。理者。是皮膚臟腑之文理也。

問曰。病人有氣色見於面部。願聞其說。

師曰。鼻頭色青。腹中痛。

苦冷者死。鼻頭色微黑者。有水氣。色黃者。胸上有寒。色白者。亡血也。設微赤非時者死。其目正圓者瘥。不治。

又色青爲痛。色黑爲勞。色赤爲風。色黃者便難。色鮮明者有留飲。

師曰。病人語聲寂然。喜驚呼者。骨節間病。語聲喑喑然不徹者。心膈間病。語聲啾啾然細而長者。頭中病。

師曰。息搖肩者。心中堅。息引胸中上氣者欬。息張口短氣者。肺痿唾沫。

師曰。吸而微數。其病在中焦。實也。當下之。即愈。虛者不治。在上焦者。其吸促。在下焦者。其吸遠。此皆難治。呼吸動搖振振者。不治。

師曰。寸口脉動者。因其王時而動。假令肝王色青。四時各隨其色。肝色青而反色白。非其時色脉。皆當病。

問曰。有未至而至。有至而不至。有至而不去。有至而太過。何謂也。

師曰。冬至之後。甲子夜半少陽起。少陽之時※。陽始生。天得溫和。以未得甲子。天因溫和。此爲未至而至也。以得甲子。

而天未溫和。此爲至而不至也※。以得甲子而天大寒不解。此爲至而不去也。以得甲子。而天溫如盛夏五六月時。此爲至而太過也。

師曰。病人脉浮者在前。其病在表。浮者在後。其病在裏。腰痛背強。不能行。必短氣而極也。

問曰。經云。厥陽獨行。何謂也。

師曰。此爲有陽無陰。故稱厥陽。

問曰。寸脉沈大而滑。沈則爲實。滑則爲氣。實氣相搏。血氣入臟即死。入腑即愈。此爲卒厥。何謂也。

師曰。唇口青。身冷。爲入臟即死。如身和汗自出。爲入腑則愈。

問曰。脉脫入臟即死。入腑即愈。何謂也。

師曰。非爲一病。百病皆然。譬如浸淫瘡。從口起流向四肢者。可治。從四肢流來入口者。不可治。病在外者可治。入裏者即死。

問曰。陽病十八。何謂也。

師曰。頭痛。項。腰。脊。臂。脚掣痛。

陰病十八。何謂也。

師曰。欬上氣喘噦。咽。腸鳴。脹滿心痛拘急。五臟病各有十八。合爲九十病。人又有六微。微有十八病。合爲一百八病。五勞七傷六極。婦人三十六病。不在其中。清邪居上。濁邪居下。大邪中表。小邪中裏。藜飪之邪。從口入者。宿食也。五邪中人。各有法度。風中於前。寒中於暮。濕傷於下。霧傷於上。風令脉浮。寒令脉急。霧傷皮腠。濕流關節。食傷脾胃。極寒傷經。極熱傷絡。

問曰。病有急當救裏救表者。何謂也。

師曰。病醫下之。續得下利。清穀不止身體疼痛者。急當救裏。後身體疼痛。清便自調者。急當救表也。

夫病痼疾，加以卒病，當先治其卒病，後乃治其痼疾也。

師曰，五藏病各有得者愈，五藏病各有所惡，各隨其所不喜者爲病，病者素不應食，而反暴思之，必發熱也。

夫諸病在藏，欲攻之，當隨其所得而攻之，如渴者，與豬苓湯，餘皆倣此。

#### ◆痙濕暍病脉證第二。

太陽病，發熱無汗，反惡寒者，名曰剛痙，太陽病，發熱汗出，而不惡寒，名曰柔痙。

太陽病，發熱，脉沈而細者，名曰痙，爲難治。

太陽病，發汗太多，因致痙。

夫風病下之則痙，復發汗必拘急。

瘡家雖身疼痛，不可發汗，汗出則痙。

病者，身熱足寒，頸項強急，惡寒，時頭熱，面赤目赤，獨頭動搖，卒口噤，背反張者，痙病也，若發其汗者，寒濕相得，其表益虛，即惡寒甚，發其汗已，其脉如蛇。

暴腹脹大者，爲欲解，脉如故，反伏弦者痙。

夫痙脉，按之緊如弦，直上下行。

痙病，有灸瘡難治。

脉經云，痙家其脉伏堅，直上下。

太陽病，其證備，身體強几几然，脉反沈遲，此爲痙，括蕞桂枝湯主之。

#### ●括蕞桂枝湯方。

括蕞根二兩，桂枝三兩，芍藥三兩，甘草二兩，生薑三兩，大棗十二枚，右六味，以水九升，煮取三升，分溫三服，取微汗，汗不出，食頃啜熱粥發之。

太陽病，無汗而小便反少，氣上衝胸，口噤不得語，欲作剛痙，葛根湯主之。

#### ●葛根湯方。

葛根四兩。麻黃三兩。去節。桂枝二兩※。去皮。芍藥二兩。甘草二兩。炙。生薑三兩。大棗十二枚。右七味。寐咀。以水一斗※。先煮麻黃葛根。減二升。去沫。內諸藥。煮取三升。去滓。溫服一升。覆取微似汗。不須啜粥。餘如桂枝湯法。將息及禁忌。

瘧爲病。胸滿口噤。臥不著席。脚攣急。必齩齒。可與大承氣湯。

●大承氣湯方。

大黃四兩。酒洗。厚朴半斤。炙。去皮。枳實五枚。炙。芒消三合。右四味。以水一斗。先煮二物。取五升。去滓。內大黃。煮取二升。去滓。內芒消。更上火。微一二沸。分溫再服。得下止服。

太陽病。關節疼痛而煩。脈沈而細者。此名濕痺。濕痺之候。小便不利。大便反快。但當利其小便。

濕家之爲病。一身盡疼。發熱。身色如熏黃也。

濕家。其人但頭汗出。背強。欲得被覆向火。若下之早則噦。或胸滿。小便不利。舌上如胎者。以丹田有熱。胸上有寒。渴欲得飲。而不能飲。則口燥煩也。

濕家下之。額上汗出。微喘。小便利者死。若下利不止者亦死。

風濕相搏。一身盡疼痛。法當汗出而解。值天陰雨不止。醫云。此可發汗。汗之病不愈者。何也。蓋發其汗。汗大出者。但風氣去。濕氣在。是故不愈也。若治風濕者。發其汗。但微微似欲出汗者。風濕俱去也。

濕家病。身疼發熱。面黃而喘。頭痛鼻塞而煩。其脈大。自能飲食。腹中和無病。病在頭中寒濕。故鼻塞。內藥鼻中則愈。

濕家身煩疼。可與麻黃加朮湯。發其汗爲宜。慎不可以火攻之。

●麻黃加朮湯方。

麻黃三兩。去節。桂枝二兩。去皮。甘草一兩。炙。

杏仁七十箇。去皮尖。白朮四兩。

右五味。以水九升。先煮麻黃。減二升。去上沫。內諸藥。煮取二升半。去滓。溫服八合。覆取微似汗。

病者一身盡疼。發熱。日晡所劇者。名風濕。此病傷於汗出當風。或久傷取冷所致也。可與麻黃杏仁薏苡甘草湯。

●麻黃杏仁薏苡甘草湯方。

麻黃去節。半兩。湯泡。甘草一兩。炙。薏苡仁半兩。

杏仁十箇。去皮尖。炒。

右剉麻豆大。每服四錢匕。水盞半。煮八分。去滓。溫服。有微汗避風。

風濕脈浮。身重。汗出惡風者。防已黃耆湯主之。

●防已黃耆湯方。

防已一兩。甘草半兩。炒。白朮七錢半。黃耆一兩一分。去蘆。

右剉麻豆大，每抄五錢匕，生薑四片，大棗一枚，水盪半。

煎八分，去滓，溫服，良久再服，喘者，加麻黃半兩，胃中不和者，加芍藥三分，氣上衝者，加桂枝三分，下有陳寒者，加細辛三分，服後當如蟲行皮中，從腰下如冰，後坐被上，又以一被繞腰以下，溫令微汗差。

傷寒八九日，風濕相搏，身體疼煩，不能自轉側，不嘔不渴，脈浮虛而澀者，桂枝附子湯主之。若大便堅，小便自利者，去桂加白朮湯主之。

●桂枝附子湯方。

桂枝四兩，去皮，生薑三兩，切，附子三枚，炮，去皮，破八片。

甘草二兩，炙，大棗十二枚，擘。

右五味，以水六升，煮取二升，去滓，分溫三服。

●白朮附子湯方。

白朮二兩，附子一枚半，炮，去皮，甘草一兩，炙。

生薑一兩半，切，大棗六枚。

右五味，以水三升，煮取一升，去滓，分溫三服，一服覺身痺，半日許再服，三服都盡，其人如冒狀，勿怪，即是朮附並走皮中，逐水氣，未得除故耳。

風濕相搏，骨節疼煩，掣痛不得屈伸，近之則痛劇，汗出短氣，小便不利，惡風不欲去衣，或身微腫者，甘草附子湯主之。

●甘草附子湯方。

甘草二兩，炙，附子二枚，炮，去皮，白朮二兩，桂枝四兩，去皮。

右四味，以水六升，煮取三升，去滓，溫服一升，日三服，初服得微汗則解，能食汗出復煩者，服五合，恐一升多者。

服六七合爲妙。

太陽中暍，發熱惡寒，身重而疼痛，其脈弦細芤遲，小便已洒洒然毛聳，手足逆冷，小有勞，身即熱，口前開板齒燥，若發其汗，則其惡寒甚，加溫鍼則發熱甚，數下之則淋甚。

太陽中熱者，暍是也，汗出惡寒，身熱而渴，白虎加人參湯主之。

●白虎人參湯方。

知母六兩，石膏一斤，碎，甘草二兩。

粳米六合，人參三兩。

右五味，以水一斗，煮米熟，湯成去滓，溫服一升，日三服。

太陽中暍，身熱疼重，而脈微弱，此以夏月傷冷水，水行皮中所致也，一物瓜蒂湯主之※。

●一物瓜蒂湯方※。

瓜蒂二十箇※。

右剉，以水一升，煮取五合，去滓，頓服。

◆百合狐惑陰陽毒病脉證并治第三※.

論曰。百合病者。百脉一宗。悉致其病也。意欲食。復不能食。常默默。欲臥不能臥。欲行不能行。欲飲食或有美時。或有不用聞食臭時。如寒無寒。如熱無熱。口苦。小便赤。諸藥不能治。得藥則劇吐利。如有神靈者。身形如和。其脉微數。每溺時頭痛者。六十日乃愈。若溺時頭不痛漸然者。四十日愈。若溺快然。但頭眩者。二十日愈。其證或未病而預見。或病四五日而出。或病二十日。或一月微見者。各隨證治之。

百合病。發汗後者。百合知母湯主之。

●百合知母湯方。

百合七枚。擘。知母三兩。切。

右先以水洗百合。漬一宿。當白沫出。去其水。更以泉水二升。煎取一升。去滓。別以泉水二升。煎知母。取一升。去滓。後合和。煎取一升五合。分温再服。

百合病。下之後者。滑石代赭湯主之。

●滑石代赭湯。

百合七枚。擘。滑石三兩。碎。綿裹。

代赭石如彈丸大。一枚。碎。綿裹。

右先以水洗百合。漬一宿。當白沫出。去其水。更以泉水二升。煎取一升。去滓。別以泉水二升。煎滑石代赭。取一升。去滓。後合和。重煎取一升五合。分温服。

百合病。吐之後者。用後方主之。

●百合雞子湯方。

百合七枚。擘。雞子黃一枚。

右先以水洗百合。漬一宿。當白沫出。去其水。更以泉水二升。煎取一升。去滓。內雞子黃攪勻煎五分。温服。

百合病。不經吐下發汗。病形如初者。百合地黄湯主之。

●百合地黄湯方。

百合七枚。擘。生地黄汁一升。

右以水洗百合。漬一宿。當白沫出。去其水。更以泉水二升。煎取一升。去滓。內地黃汁。煎取一升五合。分温再服。

中病勿更服。大便常如漆。

百合病。一月不解。變成渴者。百合洗方主之。

●百合洗方。

右以百合一升。以水一斗。漬之一宿。以洗身。洗已食煮餅。勿以鹽鼓也。

百合病。渴不差者。括蕒牡蠣散主之。

●括蕒牡蠣散方。

括蕒根。牡蠣熬。等分。

右爲細末。飲服方寸匕。日三服。

百合病。變發熱者。百合滑石散主之。

●百合滑石散方。

百合一兩。炙。滑石三兩。

右爲散。飲服方寸匕。日三服。當微利者止服。熱則除。

百合病。見於陰者。以陽法救之。見於陽者。以陰法救之。見陽攻陰。復發其汗。此爲逆。見陰攻陽。乃復下之。此亦爲逆。

狐惑之爲病。狀如傷寒。默默欲眠。目不得閉。臥起不安。蝕於喉爲惑。蝕於陰爲狐。不欲飲食。惡聞食臭。其面目乍赤乍黑乍白。

蝕於上部則聲啞。甘草瀉心湯主之。

●甘草瀉心湯方。

甘草四兩。黃芩。人參。乾薑各三兩。

黃連一兩。大棗十二枚。半夏半升。

右七味。水一斗。煮取六升。去滓再煎。溫服一升。日三服。

蝕於下部則咽乾。苦參湯洗之。

●苦參湯方※。

蝕於肛者。雄黃熏之。

●雄黃熏方※。

雄黃。

右一味爲末。筒瓦二枚合之燒。向肛熏之。

病者脉數。無熱微煩。默默但欲臥。汗出。初得之三四日。目赤如鳩眼。七八日。目四眥黑。若能食者。膿已成也。赤小豆當歸散主之。

●赤小豆當歸散方。

赤小豆三升。浸令芽出曝乾。當歸。

右二味。杵爲散。漿水服方寸匕。日三服。

陽毒之爲病。面赤斑斑如錦文。咽喉痛。唾膿血。五日可治。七日不可治。升麻鱉甲湯主之。

陰毒之爲病。面目青。身痛如被杖。咽喉痛。五日可治。七日不可治。升麻鱉甲湯去雄黃蜀椒主之。

●升麻鱉甲湯方。

升麻二兩。當歸一兩。蜀椒炒。去汗。一兩。

甘草二兩。鱉甲手指大。一片。炙。雄黃半兩。研。

右六味。以水四升。煮取一升。頓服之。老小再服取汗。

◆瘧病脉證并治第四。

師曰。瘧脉自弦。弦數者多熱。弦遲者多寒。弦小緊者下之差。弦遲者可溫之。弦緊者可發汗鍼灸也。浮大者可吐之。弦數者風發也。以飲食消息止之。

病瘧以月一日發。當以十五日愈。設不差。當月盡解。如其不差。當云何※。

師曰。此結爲癥瘕。名曰瘧母。急治之。宜鱉甲煎丸。

●鱉甲煎丸方。

鱉甲十二分。炙。烏扇三分。燒。黃芩三分。柴胡六分。

鼠婦三分。熬。乾薑三分。大黃三分。芍藥五分。

桂枝三分。葶藶一分。熬。石韋三分。去毛。厚朴三分。

牡丹五分。去心。瞿麥二分。紫葳三分。半夏一分。

人參一分。蟪蟲五分。熬。阿膠三分。炙。蜂窠四分。炙。

赤消十二分。蜣螂六分。熬。桃仁二分。

右二十三味。爲末。取鍛竈下灰一斗。清酒一斛五斗。浸灰。候酒盡一半。著鱉甲於中。煮令泛爛如膠漆。絞取汁。

內諸藥。煎爲丸。如梧子大。空心服七丸。日三服。

師曰。陰氣孤絕。陽氣獨發。則熱而少氣煩冤。手足熱而欲嘔。名曰瘧瘵。若但熱不寒者。邪氣內藏於心。外舍分肉之間。令人消鑠脫肉。

溫瘧者。其脉如平。身無寒。但熱。骨節疼煩。時嘔。白虎加桂枝湯主之。

●白虎加桂枝湯方。

知母六兩。甘草二兩。炙。石膏一斤。

粳米二合。桂枝去皮※。三兩。

右剉。每五錢。水一盞半。煎至八分。去滓。溫服。汗出愈。

瘧多寒者。名曰牡瘧。蜀漆散主之。

●蜀漆散方。

蜀漆洗※。去腥。雲母燒二日夜。龍骨等分。

右三味。杵爲散。未發前。以漿水服半錢。溫瘧。加蜀漆半分。臨發時。服一錢匕。

附。▲外臺祕要方。

●牡蠣湯。治牡瘧。

牡蠣四兩。熬。麻黃去節。四兩。甘草二兩。蜀漆三兩。

右四味。以水八升。先煮蜀漆麻黃。去上沫。得六升。內諸藥。煮取二升。溫服一升。若吐則勿更服。

●柴胡去半夏加括蕒湯。治瘧病發渴者。亦治勞瘧。

柴胡八兩。人參。黃芩。甘草各三兩。

括蕒根四兩。生薑二兩。大棗十二枚。



右七味。以水一斗二升。煮取六升。去滓。再煎取三升。溫服一升。日二服。

●柴胡桂薑湯。治瘧寒多。微有熱。或但寒不熱。

柴胡半斤。桂枝三兩。去皮。乾薑二兩。括蕒根四兩。

黃芩三兩。牡蠣三兩。熬。甘草二兩。炙。

右七味。以水一斗二升。煮取六升。去滓。再煎取三升。溫服一升。日三服。初服微煩。復服汗出便愈。

◆中風歷節病脉證并治第五。

夫風之爲病。當半身不遂。或但臂不遂者。此爲痺。脉微而數。中風使然。

寸口脉浮而緊。緊則爲寒。浮則爲虛。寒虛相搏。邪在皮膚。浮者血虛。絡脉空虛。賊邪不瀉。或左或右。邪氣反緩。正氣即急。正氣引邪。喎僻不遂。邪在於絡。肌膚不仁。邪在於經。即重不勝。邪入於府。即不識人。邪入於藏。舌即難言。口吐涎。

●侯氏黑散。治大風四肢煩重。心中惡寒不足者。

菊花四十分。白朮十分。細辛三分。茯苓三分。

牡蠣三分。桔梗八分。防風十分。人參三分。

礬石三分。黃芩五分。當歸三分。乾薑三分。

芎藭三分。桂枝三分。

右十四味。杵爲散。酒服方寸匕。日一服。初服二十日。溫酒調服。禁一切魚肉大蒜。常宜冷食。六十日止。即藥積在腹中不下也。熱食即下矣。冷食自能助藥力。

寸口脉遲而緩。遲則爲寒。緩則爲虛。榮緩則爲亡血。衛緩則爲中風。邪氣中經。則身痒而癩疹。心氣不足。邪氣入中。則胸滿而短氣。

●風引湯。除熱癰痛。

大黃。乾薑。龍骨各四兩。桂枝三兩。

甘草。牡蠣各二兩。寒水石。滑石。

赤石脂。白石脂。紫石英。石膏各六兩。

右十二味。杵麤篩。以韋囊盛之。取三指撮。井花水三升。

煮三沸。溫服一升。

●防已地黄湯。治病如狂狀。妄行獨語不休。無寒熱。其脉浮。

防已一分。桂枝三分。防風三分。甘草二分。

右四味。以酒一盃浸之一宿。絞取汁。生地黄二斤。寐咀。

蒸之如斗米飯久。以銅器盛其汁。更絞地黃汁。和分再服。

●頭風摩散方。

大附子一枚。炮。鹽等分。

右二味爲散。沐了。以方寸匕。已摩痰上。令藥力行。

寸口脉沈而弱。沈即主骨。弱即主筋。沈即爲腎。弱即爲肝。汗出入水中。如水傷心。歷節黃汗出。故曰歷節。

跌跌陽脉浮而滑。滑則穀氣實。浮則汗自出。

少陰脉浮而弱。弱則血不足。浮則爲風。風血相搏。即疼痛如掣。

盛人脉濇小。短氣自汗出。歷節疼不可屈伸。此皆飲酒汗出。當風所致。

諸肢節疼痛。身體魁羸。脚腫如脫。頭眩。短氣。温温欲吐。桂枝芍藥知母湯主之。

●桂枝芍藥知母湯方。

桂枝四兩。芍藥三兩。甘草二兩。麻黄二兩。

生薑五兩。白朮五兩。知母四兩。防風四兩。

附子二兩。炮。

右九味。以水七升。煮取二升。温服七合。日三服。

味酸則傷筋。筋傷則緩。名曰泄。鹹則傷骨。骨傷則痿。名曰枯。枯泄相搏。名曰斷泄。榮氣不通。衛不獨行。榮衛俱微。三焦無所御。

四屬斷絕。身體羸瘦。獨足腫大。黃汗出。脛冷。假令發熱。便爲歷節也。

病歷節不可屈伸。疼痛。烏頭湯主之。

●烏頭湯方。治脚氣疼痛。不可屈伸。

麻黄。芍藥。黄耆各三兩。

甘草炙。川烏五枚。寐咀。以蜜二升。煎取一升。即出烏頭。

右五味。寐咀四味。以水三升。煮取一升。去滓。内蜜煎中。

更煎之。服七合。不知盡服之。

●礬石湯。治脚氣衝心。

礬石二兩。

右一味。以漿水一斗五升。煎三五沸。浸脚良。

附方※。

▲古今錄驗。●續命湯。治中風痲。身體不能自收。口不能言。冒昧不知痛處。或拘急不得轉側。

麻黄。桂枝。當歸。人參。

石膏。乾薑。甘草各三兩。芎藭。

杏仁四十枚。

右九味。以水一斗。煮取四升。温服一升。當小汗。薄覆脊。

憑几坐。汗出則愈。不汗更服。無所禁。勿當風。并治但伏不得臥。欬逆上氣。面目浮腫。

▲千金。●三黃湯。治中風手足拘急。百節疼痛。煩熱心亂。惡寒。經日不欲飲食。

麻黃五分。獨活四分。細辛二分。

黃耆二分。黃芩三分。

右五味。以水六升。煮取二升。分溫三服。一服小汗。二服大汗。心熱。加大黃二分。腹滿。加枳實一枚。氣逆。加人參三分。悸。加牡蠣三分。渴。加括蕒根三分。先有寒。加附子一枚。

▲近效方。●朮附湯。治風虛頭重。眩。苦極。不知食味。暖肌。補中。益精氣。

白朮二兩。附子一枚半。炮。去皮。甘草一兩。炙。

右三味。剉。每五錢匕。薑五片。棗一枚。水盞半。煎七分。去滓。溫服。

▲崔氏。●八味丸。治脚氣上入。少腹不仁。

乾地黄八兩。山茱萸。薯蕷各四兩。澤瀉。

茯苓。牡丹皮各三兩。桂枝。附子炮。各一兩。

右八味。末之。煉蜜和丸梧子大。酒下十五丸。日再服。

▲千金方。●越婢加朮湯。治肉極。熱則身體津脫。腠理開。汗大泄。厲風氣。下焦脚弱。

麻黃六兩。石膏半斤。生薑三兩。

甘草二兩。白朮四兩。大棗十五枚。

右六味。以水六升。先煮麻黃。去上沫。內諸藥。煮取三升。

分溫三服。惡風。加附子一枚。炮。

#### ◆血痺虛勞病脉證并治第六。

問曰。血痺病。從何得之。

師曰。夫尊榮人。骨弱。肌膚盛重。困疲勞汗出。臥不時。動搖加被微風。遂得之。但以脉自微澹。在寸口關上小緊。宜鍼引陽氣。令脉和。緊去則愈。

血痺。陰陽俱微。寸口關上微。尺中小緊。外證身體不仁。如風痺狀。黃耆桂枝五物湯主之。

●黃耆桂枝五物湯方。

黃耆三兩。芍藥三兩。桂枝三兩。

生薑六兩。大棗十二枚。

右五味。以水六升。煮取二升。溫服七合。日三服。

夫男子平人脉大爲勞。極虛亦爲勞。

男子面色薄者。主渴及亡血。卒喘悸脉浮者。裏虛也。

男子脉虛沈弦。無寒熱。短氣裏急。小便不利。面色白。時目瞑。兼衄。少腹滿。此爲勞使之然。

勞之爲病。其脉浮大。手足煩。春夏劇。秋冬瘥。陰寒精自出。酸削不能行。

男子脉浮弱而瀋。爲無子。精氣清冷。

夫失精家。少腹弦急。陰頭寒。目眩。髮落。脉極虚芤遲。爲清穀亡血失精。

脉得諸芤動微緊。男子失精。女子夢交。桂枝龍骨牡蠣湯主之。

●桂枝加龍骨牡蠣湯方。

桂枝。芍藥。生薑各三兩。甘草二兩。

大棗十二枚。龍骨。牡蠣各三兩。

右七味。以水七升。煮取三升。分温三服。

●天雄散方。

天雄三兩。炮。白朮八兩。桂枝六兩。龍骨三兩。

右四味。杵爲散。酒服半錢匕。日三服。不知稍增之。

男子平人。脉虚弱細微者。善盜汗也。

人年五六十其病脉大者。痺俠背行。苦腸鳴馬刀俠瘦者。皆爲勞得之。

脉沈小遲名脱氣。其人疾行則喘喝。手足逆寒。腹滿甚則溇泄。食不消化也。

脉弦而大。弦則爲減。大則爲芤。減則爲寒。芤則爲虚。虚寒相搏。此名爲革。婦人則半產漏下。男子則亡血失精。

虚勞裏急。悸。衄。腹中痛。夢失精。四肢痠疼。手足煩熱。咽乾口燥。小建中湯主之。

●小建中湯方。

桂枝三兩。去皮。甘草三兩。炙。大棗十二枚。

芍藥六兩。生薑二兩。膠飴一升。

右六味。以水七升。煮取三升。去滓。內膠飴。更上微火消解。温服一升。日三服。

虚勞裏急。諸不足。黄耆建中湯主之。

虚勞腰痛。少腹拘急。小便不利者。八味腎氣丸主之。

虚勞諸不足。風氣百疾。薯蕷丸主之。

●薯蕷丸方。

薯蕷三十分。當歸。桂枝。麴。

乾地黄。豆黃卷各十分。甘草二十八分。人參七分。

芎藭。芍藥。白朮。麥門冬。

杏仁各六分。柴胡。桔梗。茯苓各五分。

阿膠七分。乾薑三分。白斂二分。防風六分。  
大棗百枚。爲膏。  
右二十一味。末之。煉蜜和丸如彈子大。空腹酒服一丸。  
一百丸爲劑。

虛勞。虛煩不得眠。酸棗湯主之。

●酸棗湯方。

酸棗仁二升。甘草一兩。知母二兩。  
茯苓二兩。芎藭二兩。深師。有生薑二兩。  
右五味。以水八升。煮酸棗仁。得六升。內諸藥。煮取三升。  
分溫三服。

五勞虛極。羸瘦腹滿。不能飲食。食傷。憂傷。飲傷。房室傷。飢傷。勞傷。經絡榮衛氣傷。內有乾血。肌膚甲錯。兩目黯黑。緩中補虛。大黃蟪蟲丸主之。

●大黃蟪蟲丸方。

大黃十分蒸。黃芩二兩。甘草三兩。桃仁一升。  
杏仁一升。芍藥四兩。乾地黃十兩。乾漆一兩。  
蟲蟲一升。水蛭百枚。蟻螬一升。蟪蟲半升。  
右十二味。末之。煉蜜和丸小豆大。酒飲服五丸。日三服。

附。▲千金翼。●炙甘草湯。治虛勞不足。

汗出而悶。脉結。

悸。行動如常。不出百日危。急者十一日死。

甘草四兩。炙。桂枝。生薑各三兩。麥門冬半升。

麻仁半升。人參。阿膠各二兩。大棗三十枚。

生地黄一斤。

右九味。以酒七升。水八升。先煮八味。取三升。去滓。內膠消盡。溫服一升。日三服。

▲肘後。●癩肝散。治冷勞。又主鬼疰一門相染。

癩肝一具。炙乾末之。水服方寸匕。日三服。

◆肺痿肺癰欬嗽上氣病脉證治第七。

問曰。熱在上焦者。因欬爲肺痿。肺痿之病。何從得之。

師曰。或從汗出。或從嘔吐。或從消渴小便利數。或從便難。又被快藥下利。重亡津液。故得之。

曰。寸口脉數。其人欬。口中反有濁唾涎沫者何。

師曰。爲肺痿之病。若口中辟辟燥。欬即胸中隱隱痛。脉反滑數。此爲肺癰。欬唾膿血。脉數虛者。爲肺痿。數實者。爲肺癰。

問曰。病欬逆。脉之。何以知此爲肺癰。當有膿血。吐之則死。其脉何類。

師曰。寸口脉微而數。微則爲風。數則爲熱。微則汗出。數則惡寒。風中於衛。呼氣不入。熱過於榮。吸而不出。風傷皮毛。熱傷血肺。風舍於肺。其人則欬。口乾喘滿。咽燥不渴。時唾濁沫。時時振寒。熱之所過。血爲之凝滯。畜結癰膿。吐如米粥。始萌可採。膿成則死。

上氣面浮腫。肩息。其脉浮大。不治。又加利尤甚。

上氣喘而躁者。屬肺脹。欲作風水。發汗則愈。

肺痿吐涎沫而不欬者。其人不渴。必遺尿。小便數。所以然者。以上虛不能制下故也。此爲肺中冷。必眩。多涎唾。甘草乾薑湯以溫之。若服湯已渴者。屬消渴。

●甘草乾薑湯方。

甘草四兩。炙。乾薑二兩。炮。

右寐咀。以水三升。煮取一升五合。去滓。分溫再服。

欬而上氣。喉中水雞聲。射干麻黃湯主之。

●射干麻黃湯方。

射干十三枚。一法。三兩。麻黃四兩。生薑四兩。細辛。

紫苑。款冬花各三兩。五味子半升。大棗七枚。

半夏大者洗。八枚。一法。半升。

右九味。以水一斗二升。先煮麻黃兩沸。去上沫。內諸藥。

煮取三升。分溫三服。

欬逆上氣。時時唾濁。但坐不得眠。皂莢丸主之。

●皂莢丸方。

皂莢八兩。刮去皮。用酥炙。

右一味。末之。蜜丸梧子大。以棗膏和湯。服三丸。日三。夜一服。

欬而脉浮者。厚朴麻黃湯主之。

●厚朴麻黃湯方。

厚朴五兩。麻黃四兩。石膏如雞子大。

杏仁半升。半夏半升。乾薑二兩。

細辛二兩。小麥一升。五味子半升。

右九味。以水一斗二升。先煮小麥熟。去滓。內諸藥。煮取三升。溫服一升。日三服。

脉沈者。澤漆湯主之。

●澤漆湯方。

半夏半升。紫參五兩。一作紫苑。澤漆三斤。以東流水五斗。

煮取一斗五升。

生薑五兩。白前五兩。甘草。

黃芩。人參。桂枝各三兩。

右九味。寐咀。內澤漆汁中。煮取五升。溫服五合。至夜盡。

大逆上氣，咽喉不利，止逆下氣者，麥門冬湯主之。

●麥門冬湯方。

麥門冬七升，半夏一升，人參二兩。

甘草二兩，粳米三合，大棗十二枚。

右六味，以水一斗二升，煮取六升，溫服一升，日三，夜一服。

肺癰喘不得臥，葶藶大棗瀉肺湯主之。

●葶藶大棗瀉肺湯方。

葶藶熬令黃色，搗丸如彈丸大，大棗十二枚。

右先以水三升，煮棗取二升，去棗，內葶藶，煮取一升，頓服。

欬而胸滿，振寒脈數，咽乾不渴，時出濁唾腥臭，久久吐膿如米粥者，爲肺癰，桔梗湯主之。

●桔梗湯方，亦治血痺。

桔梗一兩，甘草二兩。

右二味，以水三升，煮取一升，分溫再服，則吐膿血也。

欬而上氣，此爲肺脹，其人喘，目如脫狀，脈浮大者，越婢加半夏湯主之。

●越婢加半夏湯方。

麻黃六兩，石膏半斤，生薑三兩。

大棗十五枚，甘草二兩，半夏半升。

右六味，以水六升，先煮麻黃，去上沫，內諸藥，煮取三升。

分溫三服。

肺脹欬而上氣，煩燥而喘，脈浮者，心下有水，小青龍加石膏湯主之。 ●小青龍加石膏湯方。

麻黃，芍藥，桂枝。

細辛，甘草，乾薑各三兩。

五味子，半夏各半升，石膏二兩。

右九味，以水一斗，先煮麻黃，去上沫，內諸藥，煮取三升。

強人服一升，羸者減之，日三服，小兒服四合。

附。

▲外臺。 ●炙甘草湯，治肺痿涎唾多，心中溫溫液液者。

▲千金。 ●甘草湯。

甘草。

右一味，以水三升，煮減半，分溫三服。

▲千金。 ●生薑甘草湯，治肺痿欬唾，涎沫不止，咽燥而渴。

生薑五兩，人參三兩，甘草四兩，大棗十五枚。

右四味，以水七升，煮取三升，分溫三服。

▲千金。●桂枝去芍藥加皂莢湯。治肺痿吐涎沫。  
桂枝。生薑各三兩。甘草二兩。  
大棗十枚。皂莢一枚。去皮子。炙焦。  
右五味。以水七升。微微火煮。取三升。分溫三服。

▲外臺。●桔梗白散。治欬而胸滿。振寒脉數。咽乾不渴。時出濁唾腥臭。久久吐膿如米粥者。爲肺癰。  
桔梗。貝母各三分。巴豆一分。去皮。熬。研如脂。  
右三味。爲散。強人飲服半錢匕。羸者減之。病在膈上者吐膿血。膈下者瀉出。若下多不止。飲冷水一杯則定。

▲千金。●葶藶湯。治欬有微熱。煩滿。胸中甲錯。是爲肺癰。  
葶藶二升。薏苡仁半升。桃仁五十枚。瓜瓣半升。  
右四味。以水一斗。先煮葶藶。得五升。去滓。內諸藥。煮取二升。服一升。再服當吐如膿。

肺癰胸滿脹。一身面目浮腫。鼻塞。清涕出。不聞香臭酸辛。欬逆上氣。喘鳴迫塞。葶藶大棗瀉肺湯主之。

#### ◆奔豚氣病脉證治第八。

師曰。病有奔豚。有吐膿。有驚怖。有火邪。此四部病。皆從驚發得之。

師曰。奔豚病從少腹起。上衝咽喉。發作欲死復還止。皆從驚恐得之。

奔豚氣上衝胸。腹痛。往來寒熱。奔豚湯主之。

#### ●奔豚湯方。

甘草。芎藭。當歸各二兩。  
半夏四兩。黃芩二兩。生葛五兩。  
芍藥二兩。生薑四兩。甘李根白皮一升。  
右九味。以水二斗。煮取五升。溫服一升。日三。夜一服。

發汗後。燒鍼令其汗。鍼處被寒。核起而赤者。必發賁豚。氣從小腹上至心。灸其核上各一壯。與桂枝加桂湯主之。

#### ●桂枝加桂湯方。

桂枝五兩。芍藥三兩。甘草二兩。炙。  
生薑三兩。大棗十二枚。  
右五味。以水七升。微火煮取三升。去滓。溫服一升。

發汗後。臍下悸者。欲作賁豚。茯苓桂枝甘草大棗湯主之。



●茯苓桂枝甘草大棗湯方。

茯苓半斤。甘草二兩。炙。

大棗十五枚。桂枝四兩。

右四味。以甘瀾水一斗。先煮茯苓。減二升。內諸藥。煮取三升。去滓。溫服一升。日三服。

◆胸痺心痛短氣病脉證治第九。

師曰。夫脉當取太過不及。陽微陰弦。即胸痺而痛。所以然者。責其極虛也。今陽虛。知在上焦。所以胸痺心痛者。以其陰弦故也。

平人無寒熱。短氣不足以息者實也。

胸痺之病。喘息欬唾。胸背痛。短氣。寸口脉沈而遲。關上小緊數。括蕪薤白白酒湯主之。

●括蕪薤白白酒湯方。

括蕪實一枚。搗。薤白半斤。白酒七升。

右三味。同煮取二升。分溫再服。

胸痺不得臥。心痛徹背者。括蕪薤白半夏湯主之。

●括蕪薤白半夏湯方。

括蕪實一枚。薤白三兩。半夏半斤。白酒一斗。

右四味。同煮取四升。溫服一升。日三服。

胸痺。心中痞留。氣結在胸。胸滿。脇下逆搶心。枳實薤白桂枝湯主之。人參湯亦主之。

●枳實薤白桂枝湯方。

枳實四枚。厚朴四兩。薤白半斤。

桂枝一兩。括蕪一枚。搗。

右五味。以水五升。先煮枳實厚朴。取二升。去滓。內諸藥。

煮數沸。分溫三服。

●人參湯方。

人參。甘草。乾薑。白朮各三兩。

右四味。以水八升。煮取三升。溫服一升。日三服。

胸痺。胸中氣塞。短氣。茯苓杏仁甘草湯主之。橘枳薑湯亦主之。

●茯苓杏仁甘草湯方。

茯苓三兩。杏仁五十箇。甘草一兩。

右三味。以水一斗。煮取五升。溫服一升。日三服。

●橘枳薑湯方。

橘皮一斤。枳實三兩。生薑半斤。

右三味。以水五升。煮取二升。分溫再服。

胸痺緩急者。薏苡附子散主之。

●薏苡附子散方。

薏苡仁十五兩。大附子十枚。炮。

右二味。杵爲散。服方寸匕。日三服。

心中痞。諸逆心懸痛。桂枝生薑枳實湯主之。

●桂薑枳實湯方。

桂枝。生薑各三兩。枳實五枚。

右三味。以水六升。煮取三升。分溫三服。

心痛徹背。背痛徹心。烏頭赤石脂丸主之。

●赤石脂丸方。

蜀椒一兩。一法二分。烏頭一分。炮。附子半兩。一法一分。

乾薑一兩。一法一分。赤石脂一兩。一法二分。

右五味。末之。蜜丸如梧子大。先食服一丸。日三服。

●九痛丸。治九種心痛。

附子三兩。炮。生狼牙一兩。炙香。巴豆一兩。去皮心。熬。研如脂。

人參。乾薑。吳茱萸各一兩。

右六味。末之。煉蜜丸如梧子大。酒下。強人初服三丸。日三服。弱者二丸。兼治卒中惡。腹脹痛。口不能言。又治連年積冷。流注心胸痛。并冷衝上氣※。落馬墜車血疾等。

皆主之。忌口如常法。

◆腹滿寒疝宿食病脉證治第十。

跌陽脉微弦。法當腹滿。不滿者必便難。兩胠疼痛。此虛寒從下上也。以溫藥服之。

病者腹滿。按之不痛爲虛。痛者爲實。可下之。舌黃未下者。下之黃自去。

腹滿時減。復如故。此爲寒。當與溫藥。

病者痿黃。躁而不渴。胸中寒實。而利不止者死。

寸口脉弦者。即脇下拘急而痛。其人嗇嗇惡寒也。

夫中寒家喜欠。其人清涕出。發熱色和者。善嚏。

中寒其人下利。以裏虛也。欲嚏不能。此人肚中寒。

夫瘦人繞臍痛，必有風冷，穀氣不行，而反下之，其氣必衝，不衝者，心下則痞。

病腹滿，發熱十日，脉浮而數，飲食如故，厚朴七物湯主之。

●厚朴七物湯方。

厚朴半斤，甘草，大黃各三兩，大棗十枚。

枳實五枚，桂枝二兩，生薑五兩。

右七味，以水一斗，煮取四升，溫服八合，日三服，嘔者。

加半夏五合，下利，去大黃，寒多者，加生薑至半斤。

腹中寒氣，雷鳴切痛，胸脇逆滿，嘔吐，附子粳米湯主之。

●附子粳米湯方。

附子一枚，炮，半夏半升，甘草一兩。

大棗十枚，粳米半升。

右五味，以水八升，煮米熟湯，成，去滓，溫服一升，日三服。

痛而閉者，厚朴三物湯主之。

●厚朴三物湯方。

厚朴八兩，大黃四兩，枳實五枚。

右三味，以水一斗二升，先煮二味，取五升，內大黃煮取三升，溫服一升，以利爲度。

按之心下滿痛者，此爲實也，當下之，宜大柴胡湯。

●大柴胡湯方。

柴胡半斤，黃芩三兩，芍藥三兩，半夏半升，洗。

枳實四枚，炙，大黃二兩，大棗十二枚，生薑五兩。

右八味，以水一斗二升，煮取六升，去滓再煎，溫服一升。

日三服。

腹滿不減，減不足言，當須下之，宜大承氣湯。

●大承氣湯方。

大黃四兩，酒洗，厚朴半斤，去皮，炙，枳實五枚，炙，芒消三合。

右四味，以水一斗，先煮二物，取五升，去滓，內大黃，煮取二升，內芒消，更上火微一二沸，分溫再服，得下，餘勿服。

心胸中大寒痛，嘔不能飲食，腹中寒，上衝皮起，出見有頭足，上下痛而不可觸近，大建中湯主之。

●大建中湯方。

蜀椒二合，去汗，乾薑四兩，人參二兩。

右三味，以水四升，煮取二升，去滓，內膠飴一升，微火煎取一升半，分溫再服，如一炊頃，可飲粥二升，後更服，當一日食糜，溫覆之。

脇下偏痛發熱，其脉緊弦，此寒也，以溫藥下之，宜大黃附子湯。

●大黃附子湯方。

大黃三兩。附子三枚。炮。細辛二兩。

右三味。以水五升。煮取二升。分溫三服。若強人煮取二升半。分溫三服。服後如人行四五里進一服。

寒氣厥逆。赤丸主之。

●赤丸方。

茯苓四兩。半夏四兩。洗。一方用桂。烏頭二兩。炮。細辛一兩。

千金作人參。

右六味。末之。內真朱爲色。煉蜜丸如麻子大。先食酒飲下三丸。日再。夜一服。不知稍增之。以知爲度。

腹痛。脉弦而緊。弦則衛氣不行。即惡寒。緊則不欲食。邪正相搏。即爲寒疝。寒疝遶臍痛。若發則白汗出。手足厥冷。其脉沈弦者。大烏頭煎主之。

●烏頭煎方。

烏頭大者五枚。熬。去皮。不寐咀。

右以水三升。煮取一升。去滓。內蜜二升。煎令水氣盡。取二升。強人服七合。弱人服五合。不差明日更服。不可一日再服。

寒疝腹中痛。及脇痛裏急者。當歸生薑羊肉湯主之。

●當歸生薑羊肉湯方。

當歸三兩。生薑五兩。羊肉一斤。

右三味。以水八升。煮取三升。溫服七合。日三服。若寒多者。加生薑成一斤。痛多而嘔者。加橘皮二兩。白朮一兩。

加生薑者。亦加水五升。煮取三升二合服之。

寒疝腹中痛。逆冷。手足不仁。若身疼痛。灸刺諸藥不能治。抵當烏頭桂枝湯主之。

●烏頭桂枝湯方。

烏頭。

右一味。以蜜二斤。煎減半。去滓。以桂枝湯五合解之。令得一升後。初服二合。不知即服三合。又不知復加至五合。其知者如醉狀。得吐者爲中病。

●桂枝湯方。

桂枝三兩。去皮。芍藥三兩。甘草二兩。炙。

生薑三兩。大棗十二枚。

右五味。剉。以水七升。微火煮取三升。去滓。

其脉數而緊乃弦。狀如弓弦。按之不移。脉數弦者。當下其寒。脉緊大而遲者。必心下堅。脉大而緊者。陽中有陰。可下之。

附。

▲外臺。●烏頭湯。治寒疝腹中絞痛。賊風入攻五臟。拘急不得轉側。發作有時。使人陰縮。手足厥逆。

▲外臺。●柴胡桂枝湯方。治心腹卒中痛者。  
柴胡四兩。黃芩。人參。  
芍藥。桂枝。生薑各一兩半。  
甘草一兩。半夏二合半。大棗六枚。  
右九味。以水六升。煮取三升。溫服一升。日三服。

▲外臺。●走馬湯。治中惡心痛腹脹。大便不通。  
巴豆二枚。去皮心。熬。杏仁二枚。  
右二味。以綿纏。搥令碎。熱湯二合。捻取白汁飲之。當下。  
老小量之。通治飛尸鬼擊病。

問曰。人病有宿食。何以別之。

師曰。寸口脈浮而大。按之反濡。尺中亦微而濡。故知有宿食。大承氣湯主之。

脈數而滑者實也。此有宿食。下之愈。宜大承氣湯。下利不欲食者※。有宿食也。當下之。宜大承氣湯。

●大承氣湯方。

宿食在上脘。當吐之。宜瓜蒂散。

●瓜蒂散方。

瓜蒂一分。熬黃。赤小豆一分。煮。  
右二味。杵爲散。以香豉七合。煮取汁。和散一錢匕。溫服之。不吐者。少加之。以快吐爲度而止。

脈緊如轉索無常者。有宿食也。

脈緊頭痛。風寒。腹中有宿食不化也。

◆五藏風寒積聚病脈證并治第十一。

肺中風者。口燥而喘。身運而重。冒而腫脹。

肺中寒。吐濁涕。

肺死藏。浮之虛。按之弱。如葱葉。下無根者死。

肝中風者。頭目暈。兩脇痛。行常傴。令人嗜甘。

肝中寒者。兩臂不舉。舌本燥。喜太息。胸中痛。不得轉側。食則吐而汗出也。

肝死藏。浮之弱。按之如索不來。或曲如蛇行者死。

肝著。其人常欲蹈其胸上。先未苦時。但欲飲熱。旋復花湯主之。

心中風者。翁翁發熱。不能起。心中飢。食即嘔吐。

心中寒者。其人苦病心如噉蒜狀。劇者心痛徹背。背痛徹心。譬如蠱注。其脉浮者。自吐乃愈。

心傷者。其人勞倦。即頭面赤而下重。心中痛而自煩。發熱。當臍跳。其脉弦。此爲心藏傷所致也。

心死藏。浮之實。如麻豆。按之益躁疾者死。

邪哭使魂魄不安者。血氣少也。血氣少者屬於心。心氣虛者。其人則畏。合目欲眠。夢遠行而精神離散。魂魄妄行。陰氣衰者爲癲。陽氣衰者爲狂。

脾中風者。翁翁發熱。形如醉人。腹中煩重。皮目瞶瞶而短氣。

脾死藏。浮之大堅。按之如覆杯。潔潔狀如搖者死。

跌陽脉浮而濇。浮則胃氣強。濇則小便數。浮濇相搏。大便則堅。其脾爲約。麻子仁丸主之。

●麻子仁丸方。

麻子仁二升。芍藥半斤。枳實一斤。大黃一斤。

厚朴一尺。杏仁一升。

右六味。末之。煉蜜和丸梧子大。飲服十丸。日三。以知爲度。

腎著之病。其人身體重。腰中冷。如坐水中。形如水狀。反不渴。小便自利。飲食如故。病屬下焦。身勞汗出。衣裏冷濕。久久得之。腰以下冷痛。腹重如帶五千錢。甘薑苓朮湯主之。

●甘草乾薑茯苓白朮湯方。

甘草。白朮各二兩。乾薑。茯苓各四兩。

右四味。以水五升。煮取三升。分溫三服。腰中即溫。

腎死藏。浮之堅。按之亂如轉丸。益下入尺中者死。

問曰。三焦竭部。上焦竭善噫。何謂也。

師曰。上焦受中焦氣未和。不能消穀。故能噫耳。下焦竭則遺溺失便。其氣不和。不能自禁制。不須治。久則愈。

師曰。熱在上焦者。因欬爲肺痿。熱在中焦者。則爲堅。熱在下焦者則尿血。亦令淋祕不通。大腸有寒者多驚澹。有熱者便腸垢。小腸有寒者。其人下重便血。有熱者必痔。

問曰。病有積。有聚。有瘕氣。何謂也。

師曰。積者藏病也。終不移。聚者府病也。發作有時。展轉痛移。爲可治。

棄氣者。脇下痛。按之則愈復發。爲棄氣。

諸積大法。脉來細而附骨者。乃積也。

寸口。積在胸中。微出寸口。積在喉中。

關上。積在臍傍。上關上。積在心下。微下關。積在少腹。

尺中。積在氣衝。脉出左。積在左。脉出右。積在右。脉兩出。積在中央。各以其部處之。

#### ◆痰飲欬嗽病脉證并治第十二。

問曰。夫飲有四。何謂也。

師曰。有痰飲。有懸飲。有溢飲。有支飲。

問曰。四飲何以爲異。

師曰。其人素盛今瘦。水走腸間。瀝瀝有聲。謂之痰飲。飲後水流在脇下。欬唾引痛。謂之懸飲。飲水流行。歸於四肢。當汗出而不汗出。身體疼重。謂之溢飲。欬逆倚息。短氣不得臥。其形如腫。謂之支飲。

水在心。心下堅築。短氣。惡水。不欲飲。

水在肺。吐涎沫。欲飲水。

水在脾。少氣身重。

水在肝。脇下支滿。噯而痛。

水在腎。心下悸。

夫心下有留飲。其人背寒冷。如手大※。

留飲者。脇下痛引缺盆。欬嗽則輒已。

胸中有留飲。其人短氣而渴。四肢歷節痛。脉沈者有留飲。

膈上病痰。滿喘欬吐。發則寒熱。背痛腰疼。目泣自出。其人振振身濶劇。必有伏飲。

夫病人飲水多。必暴喘滿。凡食少飲多。水停心下。甚者則悸。微者短氣。脉雙弦者寒也。皆大下後善虛※。脉偏弦者飲也。

肺飲不弦。但苦喘短氣。

支飲亦喘而不能臥。加短氣。其脉平也。

病痰飲者。當以溫藥和之。

心下有痰飲。胸脇支滿。目眩。苓桂朮甘湯主之。

●苓桂朮甘湯方。

茯苓四兩。桂枝。白朮各三兩。甘草二兩。

右四味。以水六升。煮取三升。分溫三服。小便則利。

夫短氣有微飲。當從小便去之。苓桂朮甘湯主之。腎氣丸亦主之。

病者脉伏。其人欲自利。利反快。雖利心下續堅滿。此爲留飲欲去故也。甘遂半夏湯主之。

●甘遂半夏湯方。

甘遂大者三枚。半夏十二枚。以水一升。煮取半升。去滓。芍藥五枚。

甘草如指大一枚。炙。一本作無。

右四味。以水二升。煮取半升。去滓。以蜜半升。和藥汁。煎取八合。頓服之。

脉浮而細滑。傷飲。

脉弦數有寒飲。冬夏難治。

脉沈而弦者。懸飲內痛。

病懸飲者。十棗湯主之。

●十棗湯方。

芫花熬。甘遂。大棗各等分。

右三味。搗篩。以水一升五合。先煮肥大棗十枚。取八合。

去滓。內藥末。強人服一錢匕。羸人服半錢。平旦溫服之。

不下者。明日更加半錢。得快下後。糜粥自養。

病溢飲者。當發其汗。大青龍湯主之。小青龍湯亦主之。

●大青龍湯方。

麻黃六兩。去節。桂枝二兩。去皮。甘草二兩。炙。

杏仁四十箇。去皮尖。

生薑三兩。切。大棗十二枚。石膏如雞子大。碎。

右七味。以水九升。先煮麻黃。減二升。去上沫。內諸藥。煮取三升。去滓。溫服一升。取微似汗。

汗多者。溫粉粉之。

●小青龍湯方。

麻黃去節。三兩。芍藥三兩。五味子半升。乾薑三兩。

甘草三兩。炙。細辛三兩。桂枝三兩。去皮。半夏半升。湯洗。

右八味。以水一斗。先煮麻黃。減二升。去上沫。內諸藥。煮取三升。去滓。溫服一升。



膈間支飲。其人喘滿。心下痞堅。面色黧黑。其脉沈緊。得之數十日。醫吐下之不愈。木防已湯主之。虛者則愈。實者三日復發。

復與不愈者。宜木防已湯去石膏加茯苓芒消湯主之。

●木防已湯方。

木防已三兩。石膏十二枚。雞子大。桂枝二兩。人參四兩。

右四味。以水六升。煮取二升。分温再服。

●木防已加茯苓芒消湯方。

木防已。桂枝各二兩。人參。

芒消三合。茯苓各四兩。

右五味。以水六升。煮取二升。去滓。內芒消。再微煎。分温再服。微利則愈。

心下有支飲。其人苦冒眩。澤瀉湯主之。

●澤瀉湯方。

澤瀉五兩。白朮二兩。

右二味。以水二升。煮取一升。分温再服。

支飲胸滿者。厚朴大黃湯主之。

●厚朴大黃湯方。

厚朴一尺。大黃六兩。枳實四枚。

右三味。以水五升。煮取二升。分温再服。

支飲不得息。葶藶大棗瀉肺湯主之。

嘔家本渴。渴者爲欲解。今反不渴。心下有支飲故也。小半夏湯主之。

●小半夏湯方。

半夏一升。生薑半斤。

右二味。以水七升。煮取一升半。分温再服。

腹滿。口舌乾燥。此腸間有水氣。己椒歷黃丸主之。

●防已椒目葶藶大黃丸方。

防已。椒目。葶藶熬。大黃各一兩。

右四味。末之。蜜丸如梧子大。先食飲服一丸。日三服。稍增。口中有津液。渴者。加芒消半兩。

卒嘔吐。心下痞。膈間有水。眩悸者。半夏加茯苓湯主之。

●小半夏加茯苓湯方。

半夏一升。生薑半斤。茯苓三兩。一法四兩。

右三味。以水七升。煮取一升五合。分温再服。

假令瘦人。臍下有悸。吐涎沫而癩眩。此水也。五苓散主之。

●五苓散方。

澤瀉一兩一分。猪苓三分。去皮。茯苓三分。

白朮三分。桂枝二分※。去皮。

右五味。爲末。白飲服方寸匕。日三服。多飲暖水。汗出愈。  
附方。

▲外臺。●茯苓飲。治心胸中有停痰宿水。自吐出水後。心胸間虛。氣滿不能食。消痰氣令能食。  
茯苓。人參。白朮各三兩。

枳實二兩。橘皮二兩半。生薑四兩。

右六味。水六升。煮取一升八合。分溫三服。如人行八九里進之。

欬家。其脉弦。爲有水。十棗湯主之。

夫有支飲家。欬煩。胸中痛者。不卒死。至一百日一歲。宜十棗湯。

久欬數歲。其脉弱者可治。實大數者死。其脉虛者必苦冒。其人本有支飲在胸中故也。治屬飲家。

欬逆倚息不得臥。小青龍湯主之。

青龍湯下已。多唾口燥。寸脉沈。尺脉微。手足厥逆。氣從小腹上衝胸咽。手足痺。其面翕然熱如醉狀。因復下流陰股。小便難。時復冒者。與茯苓桂枝五味甘草湯。治其氣衝。

●桂苓五味甘草湯方。

茯苓四兩。桂枝四兩。去皮。甘草炙。三兩。五味子半升。

右四味。以水八升。煮取三升。去滓。分三溫服。

衝氣即低。而反更欬。胸滿者。用桂苓五味甘草湯。去桂加乾薑細辛。以治其欬滿。

●苓甘五味薑辛湯。

茯苓四兩。甘草。乾薑。

細辛各三兩。五味子半升。

右五味。以水八升。煮取三升。去滓。溫服半升。日三。

欬滿即止。而更復渴。衝氣復發者。以細辛乾薑爲熱藥也。服之當遂渴。而渴反止者。爲支飲也。支飲者。法當冒。冒者必嘔。嘔者復內半夏。以去其水。

●桂苓五味甘草去桂加乾薑細辛半夏湯方。

茯苓四兩。甘草。細辛。

乾薑各二兩。五味子。半夏各半升。

右六味。以水八升。煮取三升。去滓。溫服半升。日三。

水去嘔止。其人形腫者。加杏仁主之。其證應內麻黃。以其人遂痺。故不內之。若逆而內之者必厥。所以然者。以其人血虛。麻黃發其陽故也。

●苓甘五味加薑辛半夏杏仁湯方。

茯苓四兩。甘草三兩。五味子半升。乾薑三兩。

細辛三兩。半夏半升。杏仁半升。去皮尖。

右七味。以水一斗。煮取三升。去滓。溫服半升。日三。

若面熱如醉。此爲胃熱上衝熏其面。加大黃以利之。

●苓甘五味加薑辛半杏大黃湯方※。

茯苓四兩。甘草三兩。五味子半升。乾薑三兩。

細辛三兩。半夏半升。杏仁半升。大黃三兩。

右八味。以水一斗。煮取三升。去滓。溫服半升。日三。

先渴後嘔。爲水停心下。此屬飲家。小半夏茯苓湯主之。

◆消渴小便利淋病脉證并治第十三。

厥陰之爲病。消渴。氣上衝心。心中疼熱。飢而不欲食。食即吐。下之不肯止。

寸口脉浮而遲。浮即爲虛。遲即爲勞。虛則衛氣不足。勞則榮氣竭。趺陽脉浮而數。浮即爲氣。數即消穀而大堅。氣盛則溲數。溲數即堅。堅數相搏。即爲消渴。

男子消渴。小便反多。以飲一斗。小便一斗。腎氣丸主之。

脉浮。小便不利。微熱消渴者。宜利小便發汗。五苓散主之。

渴欲飲水。水入則吐者。名曰水逆。五苓散主之。

渴欲飲水不止者。文蛤散主之。

●文蛤散方。

文蛤五兩。

右一味。杵爲散。以沸湯五合。和服方寸匕。

淋之爲病。小便如粟狀。小腹弦急。痛引臍中。

趺陽脉數。胃中有熱。即消穀引食。大便必堅。小便即數。

淋家不可發汗。發汗則必便血。

小便不利者。有水氣。其人若渴。括蔞瞿麥丸主之。

●括蔞瞿麥丸。

括蔞根二兩。茯苓。薯蕷各三兩。

附子一枚。炮。瞿麥一兩。

右五味。末之。煉蜜丸梧子大。飲服三丸。日三服。不知增至七八丸。以小便利。腹中溫爲知。

小便不利。蒲灰散主之。滑石白魚散。茯苓戎鹽湯並主之。

●蒲灰散方。

蒲灰七分。滑石三分。

右二味。杵爲散。飲服方寸匕。日三服。

●滑石白魚散方。

滑石二分。亂髮二分。燒。白魚二分。

右三味。杵爲散。飲服半錢匕。日三服。

●茯苓戎鹽湯方。

茯苓半斤。白朮二兩。戎鹽彈丸大。一枚。

右三味。

渴欲飲水。口乾舌燥者。白虎加人參湯主之。

脉浮。發熱。渴欲飲水。小便不利者。猪苓湯主之。

●猪苓湯方。

猪苓去皮。茯苓。阿膠。

滑石。澤瀉各一兩。

右五味。以水四升。先煮四味。取二升。去滓。內膠烱消。溫服七合。日三服。

◆水氣病脉證并治第十四。

師曰。病有風水。有皮水。有正水。有石水。有黃汗。風水。其脉自浮。

外證骨節疼痛。惡風。皮水。其脉亦浮。外證胛腫。按之沒指。不惡風。其腹如鼓。不渴。當發其汗。正水。其脉沈遲。外證自喘。石水。其脉自沈。外證腹滿。不喘。黃汗。其脉沈遲。身發熱。胸滿。四肢頭面腫。久不愈。必致癰膿。

脉浮而洪。浮則爲風。洪則爲氣。風氣相搏。風強則爲隱疹。身體爲痒。痒爲泄風。久爲痂癩。氣強則爲水。難以俛仰。風氣相擊。身體洪腫。汗出乃愈。惡風則虛。此爲風水。不惡風者。小便通利。上焦有寒。其口多涎。此爲黃汗。

寸口脉沈滑者。中有水氣。面目腫大有熱。名曰風水。視人之目裹上。微擁如蠶新臥起狀。其頸脉動。時時欬。按其手足上。陷而不起者。風水。

太陽病。脉浮而緊。法當骨節疼痛。反不疼。身體反重而酸。其人不渴。汗出即愈。此爲風水。惡寒者。此爲極虛。發汗得之。渴而不惡寒者。此爲皮水。身腫而冷。狀如周痺。胸中窒不能食。反聚痛。暮躁不得眠。此爲黃汗。痛在骨節。欬而喘。不渴者。此爲脾脹。其狀如腫。發汗即愈。然諸病此者。渴而下利。小便數者。皆不可發汗。

裏水者。一身面目黃腫。其脉沈。小便不利。故令病水。假如小便自利。此亡津液。故令渴也。越婢加朮湯主之。

跌陽脉當伏。今反緊。本自有寒。疝瘕腹中痛。醫反下之。下之即胸滿短氣。

跌陽脉當伏。今反數。本自有熱。消穀。小便數。今反不利。此欲作水。

寸口脉浮而遲。浮脉則熱。遲脉則潛。熱潛相搏。名曰沈。

跌陽脉浮而數。浮脉即熱。數脉即止。熱止相搏。名曰伏。

沈伏相搏。名曰水。

沈則絡脉虛。伏則小便難。虛難相搏。水走皮膚即爲水矣。

寸口脉弦而緊。弦則衛氣不行。即惡寒。水不沾流。走於腸間。

少陰脉緊而沈。緊則爲痛。沈則爲水。小便即難。

脉得諸沈。當責有水。身體腫重。水病脉出者死。

夫水病人。目下有臥蠱。面目鮮澤。脉伏。其人消渴。病水腹大。小便不利。其脉沈絕者。有水。可下之。

問曰。病下利後。渴飲水。小便不利。腹滿因腫者何也。荅曰。此法當病水。若小便自利。及汗出者。自當愈。

心水者。其身重而少氣不得臥。煩而燥。其人陰腫。

肝水者。其腹大。不能自轉側。脇下腹痛。時時律液微生。小便續通。

肺水者。其身腫。小便難。時時鴨溏。

脾水者。其腹大。四肢苦重。律液不生。但苦少氣小便難。

腎水者。其腹大臍腫。腰痛不得溺。陰下濕如牛鼻上汗。其足逆冷。面反瘦。

師曰。諸有水者。腰以下腫。當利小便。腰以上腫。當發汗。乃愈。

師曰。寸口脉沈而遲。沈則爲水。遲則爲寒。寒水相搏。跌陽脉伏。水穀不化。脾氣衰則驚漉。胃氣衰則身腫。少陽脉卑。少陰脉細。男子則小便不利。婦人則經水不通。經爲血。血不利則爲水。名曰血分。

問曰。病者苦水。面目身體四肢皆腫。小便不利。脉之不言水。反言胸中痛。氣上衝咽。狀如炙肉。當微欬喘。審如師言。其脉何類。

師曰。寸口脉沈而緊。沈爲水。緊爲寒。沈緊相搏。結在關元。始時當微。年盛不覺。

陽衰之後。榮衛相干。陽損陰盛。結寒微動。腎氣上衝。喉咽塞噎。脇下急痛。

醫以爲留飲，而大下之，氣擊不去，其病不除，後重吐之，胃家虛煩，咽燥欲飲水，小便不利，水穀不化，面目手足浮腫。

又與葶藶丸下水，當時如小差，食飲過度，腫復如前，胸脇苦痛，象若奔豚，其水揚溢，則浮欬喘逆。

當先攻擊衝氣令止，乃治欬，欬止其喘自差，先治新病，病當在後。

風水脉浮，身重汗出惡風者，防已黃耆湯主之，腹痛加芍藥。

●防已黃耆湯方。

防已一兩，黃耆一兩一分，白朮三分，甘草半兩，炙。

右剉，每服五錢匕，生薑四片，棗一枚，水盞半，煎取八分。

去滓，溫服，良久再服。

風水惡風，一身悉腫，脉浮不渴，續自汗出，無大熱，越婢湯主之。

●越婢湯方。

麻黃六兩，石膏半斤，生薑三兩。

大棗十五枚，甘草二兩。

右五味，以水六升，先煮麻黃，去上沫，內諸藥，煮取三升。

分溫三服，惡風者，加附子一枚，炮，風水加朮四兩。

皮水爲病，四肢腫，水氣在皮膚中，四肢聶聶動者，防已茯苓湯主之。

●防已茯苓湯方。

防已三兩，黃耆三兩，桂枝三兩。

茯苓六兩，甘草二兩。

右五味，以水六升，煮取二升，分溫三服。

裏水，越婢加朮湯主之，甘草麻黃湯亦主之。

●越婢加朮湯方。

●甘草麻黃湯方。

甘草二兩，麻黃四兩。

右二味，以水五升，先煮麻黃，去上沫，內甘草，煮取三升。

溫服一升，重覆汗出，不汗再服，慎風寒。

水之爲病，其脉沈小，屬少陰，浮者爲風，無水虛脹者爲氣，水發其汗即已，脉沈者，宜麻黃附子湯，浮者宜杏子湯。

●麻黃附子湯方。

麻黃三兩，甘草二兩，附子一枚，炮。

右三味，以水七升，先煮麻黃，去上沫，內諸藥，煮取二升半，溫服八分，日三服。

●杏子湯方。

厥而皮水者，蒲灰散主之。

問曰。黃汗之爲病。身體腫。發熱汗出而渴。狀如風水。汗沾衣。色正黃如藥汁。脉自沈。何從得之。

師曰。以汗出入水中浴。水從汗孔入得之。宜耆芍桂酒湯主之。

●黃耆芍桂枝苦酒湯方。

黃耆五兩。芍藥三兩。桂枝三兩。

右三味。以苦酒一升。水七升。相和。煮取三升。溫服一升。

當心煩。服至六七日乃解。若心煩不止者。以苦酒阻故也。

黃汗之病。兩脛自冷。假令發熱。此屬歷節。食已汗出。又身常暮盜汗出者。此勞氣也。若汗出已。反發熱者。久久其身必甲錯。發熱不止者。必生惡瘡。若身重汗出已。輒輕者。久久必身瞶。瞶即胸中痛。又從腰以上必汗出。下無汗。腰髀弛痛。如有物在皮中狀。劇者不能食。身疼重頰燥。小便不利。此爲黃汗。桂枝加黃耆湯主之。

●桂枝加黃耆湯方。

桂枝。芍藥各三兩。甘草二兩。

生薑三兩。大棗十二枚。黃耆二兩。

右六味。以水八升。煮取三升。溫服一升。須臾飲熱稀粥一升餘。以助藥力。溫服取微汗。若不汗更服。

師曰。寸口脉遲而澹。遲則爲寒。澹爲血不足。跌陽脉微而遲。微則爲氣。遲則爲寒。寒氣不足。則手足逆冷。手足逆冷。則榮衛不利。榮衛不利。則腹滿脇鳴相逐。氣轉膀胱。榮衛俱勞。陽氣不通即身冷。陰氣不通即骨疼。陽前通則惡寒。陰前通則痺不仁。陰陽相得。其氣乃行。大氣一轉。其氣乃散。實則失氣。虛則遺尿。名曰氣分。

氣分。心下堅。大如盤。邊如旋杯。水飲所作。桂枝去芍藥加麻辛附子湯主之。

●桂枝去芍藥加麻黃細辛附子湯方。

桂枝。生薑三兩。甘草二兩。大棗十二枚。

麻黃。細辛各二兩。附子一枚。炮。

右七味。以水七升。煮麻黃。去上沫。內諸藥。煮取二升。分溫三服。當汗出。如蟲行皮中則愈。

心下堅。大如盤。邊如旋盤。水飲所作。枳朮湯主之。

●枳朮湯方。

枳實七枚。白朮二兩。

右二味。以水五升。煮取三升。分溫三服。腹中臈即當散也。

附方。

▲外臺。●防已黃耆湯。治風水脉浮。爲在表。其人或頭汗出。表無他病。病者但下重。從腰以上爲和。腰以下當腫及陰。難以屈伸。

◆黃疸病脈證并治第十五。

寸口脈浮而緩。浮則爲風。緩則爲痺。痺非中風。四肢苦煩。脾色必黃。瘀熱以行。

跌陽脈緊而數。數則爲熱。熱則消穀。緊則爲寒。食即爲滿。尺脈浮爲傷腎。跌陽脈緊爲傷脾。風寒相搏。食穀即眩。穀氣不消。胃中苦濁。濁氣下流。小便不通。陰被其寒。熱流膀胱。身體盡黃。名曰穀疸。

額上黑。微汗出。手足中熱。薄暮即發。膀胱急。小便自利。名曰女勞疸。腹如水狀不治。心中懊懣而熱。不能食。時欲吐。名曰酒疸。

陽明病脈遲者。食難用飽。飽則發煩。頭眩。小便必難。此欲作穀疸。雖下之。腹滿如故。所以然者。脈遲故也。

夫病酒黃疸。必小便不利。其候心中熱。足下熱。是其證也。

酒黃疸者。或無熱。靖言了※。腹滿欲吐。鼻燥。其脈浮者。先吐之。沈弦者。先下之。

酒疸心中熱。欲嘔者。吐之愈。

酒疸下之。久久爲黑疸。目青面黑。心中如噉蒜齏狀。大便正黑。皮膚爪之不仁。其脈浮弱雖黑微黃。故知之。

師曰。病黃疸。發熱煩喘。胸滿口燥者。以病發時。火劫其汗。兩熱所得。然黃家所得。從濕得之。一身盡發熱。而黃肚熱。熱在裏。當下之。

脈沈。渴欲飲水。小便不利者。皆發黃。

腹滿。舌痿黃。燥不得睡。屬黃家。

黃疸之病。當以十八日爲期。治之十日以上瘥。反極爲難治。疸而渴者。其疸難治。

疸而不渴者。其疸可治。發於陰部。其人必嘔。陽部。其人振寒而發熱也。

穀疸之爲病。寒熱不食。食即頭眩。心胸不安。久久發黃。爲穀疸。茵陳蒿湯主之。

●茵陳蒿湯方。

茵陳蒿六兩。梔子十四枚。大黃二兩。

右三味。以水一斗。先煮茵陳。減六升。內二味。煮取三升。

去滓。分溫三服。小便當利。尿如皂角汁狀。色正赤。一宿腹減。黃從小便去也。

黃家。日晡所發熱。而反惡寒。此爲女勞得之。膀胱急。少腹滿。身盡黃。額上黑。足下熱。因作黑疸。其腹脹如水狀。大便必黑。時溇。此女勞之病。非水也。腹滿者難治。消石礬石散主之。

●消石礬石散方。



消石。礬石燒。等分。

右二味。爲散。以大麥粥汁。和服方寸匕。日三服。病隨大小便去。小便正黃。大便正黑。是候也。

酒黃疸。心中懊懣。或熱痛。梔子大黃湯主之。

●梔子大黃湯方。

梔子十四枚。大黃一兩。枳實五枚。豉一升。

右四味。以水六升。煮取二升。分溫三服。

諸病黃家。但利其小便。假令脈浮。當以汗解之。宜桂枝加黃耆湯主之。

諸黃。豬膏髮煎主之。

●豬膏髮煎方。

豬膏半斤。亂髮如雞子大。三枚。

右二味。和膏中煎之。髮消藥成。分再服。病從小便出。

黃疸病。茵陳五苓散主之。

●茵陳五苓散方。

茵陳蒿末十分。五苓散五分。方見痰飲中。

右二味和。先食飲方寸匕。日三服。

黃疸腹滿。小便不利而赤。自汗出。此爲表和裏實。當下之。宜大黃消石湯。

●大黃消石湯方。

大黃。黃蘗。消石各四兩。梔子十五枚。

右四味。以水六升。煮取二升。去滓。內消。更煮取一升。頓服。

黃疸病。小便色不變。欲自利。腹滿而喘。不可除熱。熱除必噦。噦者。小半夏湯主之。

諸黃。腹痛而嘔者。宜柴胡湯。

男子黃。小便自利。當與虛勞小建中傷。

附方。

●瓜蒂湯※。治諸黃。

▲千金。●麻黃醇酒湯。治黃疸。

麻黃三兩。

右一味。以美清酒五升。煮取二升半。頓服盡。冬月用酒。春月用水煮之。

◆驚悸吐衄下血胸滿瘀血病脈證治第十六。

寸口脉動而弱。動即爲驚。弱則爲悸。

師曰。尺脉浮。目睛暈黃。衄未止。暈黃去。目睛慧了。知衄今止。

又曰。從春至夏衄者太陽。從秋至冬衄者陽明。

衄家不可汗。汗出必額上陷。脉緊急。直視不能眴。不得眠。

病人面無血色。無寒熱。脉沈弦者衄。浮弱手按之絕者下血。煩欬者必吐血。

夫吐血欬逆上氣。其脉數而有熱。不得臥者死。

夫酒客欬者。必致吐血。此因極飲過度所致也。

寸口脉弦而大。弦則爲減。大則爲芤。減則爲寒。芤則爲虛。寒虛相擊。此名曰革。婦人則半產漏下。男子則亡血。

亡血不可發其表。汗出則寒慄而振。

病人胸滿。唇痿。舌青。口燥。但欲嗽水。不欲嚥。無寒熱。脉微大來遲。腹不滿。其人言我滿。爲有瘀血。

病者如熱狀。煩滿。口乾燥而渴。其脉反無熱。此爲陰伏※。是瘀血也。當下之。

火邪者。桂枝去芍藥加蜀漆牡蠣龍骨救逆湯主之。

●桂枝救逆湯方。

桂枝三兩。去皮。甘草二兩。炙。生薑三兩。牡蠣五兩。熬。

龍骨四兩。大棗十二枚。蜀漆三兩。洗去腥。

右爲末。以水一斗二升。先煮蜀漆。減二升。內諸藥。煮取三升。去滓。溫服一升。

心下悸者。半夏麻黃丸主之。

●半夏麻黃丸方。

半夏。麻黃等分。

右二味。末之。煉蜜和丸小豆大。飲服三丸。日三服。

吐血不止者。栝葉湯主之。

●栝葉湯方。

栝葉。乾薑各三兩。艾三把。

右三味。以水五升。取馬通汁一升。合煮取一升。分溫再服。

下血。先便後血。此遠血也。黃土湯主之。

●黄土湯方。

甘草。乾地黄。白朮。附子炮。  
阿膠。黃芩各三兩。竈中黃土半斤。  
右七味。以水八升。煮取三升。分溫二服。

下血。先血後便。此近血也。赤小豆當歸散主之。

心氣不足。吐血衄血。瀉心湯主之。

●瀉心湯方。

大黃二兩。黃連。黃芩各一兩。  
右三味。以水三升。煮取一升。頓服之。

◆嘔吐噦下利病脈證治第十七。

夫嘔家有癰膿。不可治嘔。膿盡自愈。先嘔却渴者。此爲欲解。

先渴却嘔者。爲水停心下。此屬飲家。嘔家本渴。今反不渴者。以心下有支飲故也。此屬支飲。

問曰。病人脈數。數爲熱。當消穀引食。而反吐者。何也。

師曰。以發其汗。令陽微。膈氣虛。脈乃數。數爲客熱。不能消穀。胃中虛冷故也。脈弦者虛也。胃氣無餘。朝食暮吐。變爲胃反。寒在於上。醫反下之。令脈反弦。故名曰虛。

寸口脈微而數。微則無氣。無氣則榮虛。榮虛則血不足。血不足則胸中冷。

跌陽脈浮而濇。浮則爲虛。濇則傷脾。脾傷則不磨。朝食暮吐。暮食朝吐。宿穀不化。名曰胃反。脈緊而濇。其病難治。

病人欲吐者。不可下之。

噦而腹滿。視其前後。知何部不利。利之即愈。

嘔而胸滿者。茱萸湯主之。

●茱萸湯方。

吳茱萸一升。人參三兩。生薑六兩。大棗十二枚。  
右四味。以水五升。煮取三升。溫服七合。日三服。

乾嘔吐涎沫。頭痛者。茱萸湯主之。

嘔而腸鳴。心下痞者。半夏瀉心湯主之。

●半夏瀉心湯方。

半夏半升。洗。黃芩。乾薑。人參各三兩。

黃連一兩。大棗十二枚。甘草三兩。炙。

右七味。以水一斗。煮取六升。去滓。再煮取三升。溫服一升。日三服。

乾嘔而利者。黃芩加半夏生薑湯主之。

●黃芩加半夏生薑湯方。

黃芩三兩。甘草二兩。炙。芍藥二兩。

半夏半升。生薑三兩。大棗二十枚。

右六味。以水一斗。煮取三升。去滓。溫服一升。日再。夜一服。

諸嘔吐。穀不得下者。小半夏湯主之。

嘔吐而病在膈上。後思水者解。急與之。思水者。猪苓散主之。

●猪苓散方。

猪苓。茯苓。白朮各等分。

右三味。杵爲散。飲服方寸匕。日三服。

嘔而脈弱。小便復利。身有微熱。見厥者。難治。四逆湯主之。

●四逆湯方。

附子一枚。生用。乾薑一兩半。甘草二兩。炙。

右三味。以水三升。煮取一升二合。去滓。分溫再服。強人可大附子一枚。乾薑三兩。

嘔而發熱者。小柴胡湯主之。

●小柴胡湯方。

柴胡半斤。黃芩三兩。人參三兩。甘草三兩。

半夏半斤。生薑三兩。大棗十二枚。

右七味。以水一斗二升。煮取六升。去滓。再煎取三升。溫服一升。日三服。

胃反嘔吐者。大半夏湯主之。

●大半夏湯方※。

半夏二升。洗。完用。人參三兩。白蜜一升。

右三味。以水一斗二升和蜜。揚之二百四十遍。煮藥取二升半。溫服一升。餘分再服。

食已即吐者。大黃甘草湯主之。

●大黃甘草湯方。

大黃四兩。甘草一兩。

右二味。以水三升。煮取一升。分溫再服。

胃反吐而渴。欲飲水者。茯苓澤瀉湯主之。

●茯苓澤瀉湯方。

茯苓半斤。澤瀉四兩。甘草二兩。

桂枝二兩。白朮三兩。生薑四兩。

右六味。以水一斗。煮取三升。內澤瀉。再煮取二升半。溫服八合。日三服。

吐後。渴欲得水。而貪飲者。文蛤湯主之。兼主微風脈緊頭痛※。

●文蛤湯方。

文蛤五兩。麻黃。甘草。生薑各三兩。

石膏五兩。杏仁五十枚。大棗十二枚。

右七味。以水六升。煮取二升。溫服一升。汗出即愈。

乾嘔吐逆。吐涎沫。半夏乾薑散主之。

●半夏乾薑散方。

半夏。乾薑各等分。

右二味。杵爲散。取方寸匕。漿水一升半。煎取七合。頓服之。

病人胸中似喘不喘。似嘔不嘔。似噦不噦。徹心中憤憤然無奈者。生薑半夏湯主之。

●生薑半夏湯方※。

半夏半升※。生薑汁一升。

右二味。以水三升。煮半夏取二升。內生薑汁。煮取一升半。小冷。分四服。日三。夜一服。止停後服。

乾嘔噦。若手足厥者。橘皮湯主之。

●橘皮湯方。

橘皮四兩。生薑半斤。

右二味。以水七升。煮取三升。溫服一升。下咽則愈。

噦逆者。橘皮竹茹湯主之。

●橘皮竹茹湯方。

橘皮二升。竹茹二升。大棗三十枚。

生薑半斤。甘草五兩。人參一兩。

右六味。以水一斗。煮取三升。溫服一升。日三服。

夫六府氣絕於外者。手足寒。上氣脚縮。五藏氣絕於內者。利不禁。下甚者。手足不仁。

下利脈沈弦者下重。脈大者爲未止。脈微弱數者。爲欲自止。雖發熱不死。

下利手足厥冷。無脈者。灸之不溫。若脈不還。反微喘者死。少陰負趺陽者。爲順也。

下利有微熱而渴。脈弱者。今自愈。

下利脈數。有微熱汗出。今自愈。設脈緊爲未解。

下利脈數而渴者。今自愈。設不差。必清膿血。以有熱故也。

下利脉反弦。發熱身汗者。自愈。

下利氣者。當利其小便。

下利寸脉反浮數。尺中自濇者。必清膿血。

下利清穀。不可攻其表。汗出必脹滿。

下利脉沈而遲。其人面少赤。身有微熱。

下利清穀者。必鬱冒汗出而解。病人必微熱。所以然者。其面戴陽下虛故也。

下利後脉絕。手足厥冷。晬時脉還。手足溫者生。脉不還者死。

下利腹脹滿。身體疼痛者。先溫其裏。乃攻其表。溫裏宜四逆湯。攻表宜桂枝湯。

●四逆湯方。

●桂枝湯方。

桂枝三兩。去皮。芍藥三兩。甘草二兩。炙。生薑三兩。

大棗十二枚。

右五味。麻咀。以水七升。微火煮取三升。去滓。適寒溫。服一升。服已須臾啜稀粥一升。以助藥力。溫覆令一時許。

遍身漿漿。微似有汗者益佳。不可令如水淋漓。若一服汗出病差。停後服。

下利。三部脉皆平。按之心下堅者。急下之。宜大承氣湯。

下利。脉遲而滑者。實也。利未欲止。急下之。宜大承氣湯。

下利。脉反滑者。當有所去。下乃愈。宜大承氣湯。

下利已差。至其年月日時復發者。以病不盡故也。當下之。宜大承氣湯。

●大承氣湯方。

下利讞語者。有燥屎也。小承氣湯主之。

●小承氣湯方。

大黃四兩。厚朴二兩。炙。枳實大者三枚。炙。

右三味。以水四升。煮取一升二合。去滓。分溫二服。

下利便膿血者。桃花湯主之。

●桃花湯方。

赤石脂一斤。一半剉。一半篩末。乾薑一兩。粳米一升。

右三味。以水七升。煮米令熟。去滓。溫七合。內赤石脂末方寸匕。日三服。若一服愈。餘勿服。

熱利下重者。白頭翁湯主之。

●白頭翁湯方。

白頭翁二兩。黃連。黃栢。秦皮各三兩。

右四味。以水七升。煮取二升。去滓。溫服一升。不愈更服。

下利後更煩。按之心下濡者。爲虛煩也。梔子豉湯主之。

●梔子豉湯方。

梔子十四枚。香豉四合。絹裹。

右二味。以水四升。先煮梔子。得二升半。內豉。煮取一升半。去滓。分二服。溫進一服。得吐則止。

下利清穀。裏寒外熱。汗出而厥者。通脈四逆湯主之。

●通脈四逆湯方。

附子大者一枚。生用。乾薑三兩。強人可四兩。甘草二兩。炙。

右三味。以水三升。煮取一升二合。去滓。分溫再服。

下利肺痛。紫參湯主之。

●紫參湯方。

紫參半斤。甘草三兩。

右二味。以水五升。先煮紫參。取二升。內甘草。煮取一升半。分溫三服。

氣利。詞梨勒散主之。

●詞梨勒散方。

詞梨勒十枚。煨。

右一味。爲散。粥飲和。頓服。

附方。

▲千金翼。 ●小承氣湯。治大便不通。噦。數譫語。

▲外臺。 ●黃芩湯。治乾嘔下利。

黃芩。人參。乾薑各三兩。桂枝一兩。

大棗十二枚。半夏半升。

右六味。以水七升。煮取三升。溫分三服。

◆瘡癰腸癰浸淫病脉證并治第十八。

諸浮數脉。應當發熱。而反洒淅惡寒。若有痛處。當發其癰。

師曰。諸癰腫。欲知有膿無膿。以手掩腫上。熱者爲有膿。不熱者爲無膿。

腸癰之爲病。其身甲錯。腹皮急。按之濡。如腫狀。腹無積聚。身無熱。脉數。此爲腹內有癰膿。薏苡附子敗醬散主之。

●薏苡附子敗醬散方。

薏苡仁十分。附子二分。敗醬五分。

右三味。杵爲末。取方寸匕。以水二升。煎減半。頓服。

腸癰者。少腹腫痞。按之即痛。如淋。小便自調。時時發熱。自汗出。復惡寒。其脉遲緊者。膿未成。可下之。當有血。脉洪數者。膿已成。不可下也。大黃牡丹湯主之。

●大黃牡丹湯方。

大黃四兩。牡丹一兩。桃仁五十枚。

瓜子半升。芒消三合。

右五味。以水六升。煮取一升。去滓。內芒消。再煎沸。頓服之。有膿當下。如無膿當下血。

問曰。寸口脉浮微而澀。然當亡血若汗出。設不汗者云何。

答曰。若身有瘡。被刀斧所傷。亡血故也。

病金瘡。王不留行散主之。

●王不留行散方※。

王不留行十分。八月八日採。蒴藋細葉十分。七月七日採。

桑東南根白皮。十分。三月三日採。甘草十八分。

川椒三分。除目及閉口。去汗※。黃芩二分。

乾薑二分。芍藥二分。厚朴二分。

右九味。桑根皮以上三味。燒灰存性。勿令灰過。各別杵篩。合治之。爲散。服方寸匕。小瘡則粉之。大瘡但服之。產後亦可服。如風寒。桑東根勿取之。前三物皆陰乾百日。

●排膿散方。

枳實十六枚。芍藥六分。桔梗二分。

右三味。杵爲散。取雞子黃一枚。以藥散與雞黃相等。揉和令相得。飲和服之。日一服。

●排膿湯方。

甘草二兩。桔梗三兩。生薑一兩。大棗十枚。

右四味。以水三升。煮取一升。溫服五合。日再服。

浸淫瘡從口流向四肢者可治。從四肢流來入口者。不可治。

浸淫瘡。黃連粉主之。



◆跌蹶手指臂腫轉筋陰狐疝虻蟲病脉證治第十九。

師曰。病跌蹶。其人但能前不能却。刺腓入二寸。此太陽經傷也。

病人常以手指臂腫動。此人身體濶濶者。藜蘆甘草湯主之。

●藜蘆甘草湯方。

轉筋之爲病。其人臂脚直。脉上下行微弦。轉筋入腹者。雞屎白散主之。

●雞屎白散方。

雞屎白。

右一味。爲散。取方寸匕。以水六合和。溫服。

陰狐疝氣者。偏有小大。時時上下。蜘蛛散主之。

●蜘蛛散方※。

蜘蛛十四枚。熬焦。桂枝半兩。

右二味。爲散。取八分一匕。飲和服。日再服。蜜丸亦可。

問曰。病腹痛有蟲。其脉何以別之。

師曰。腹中痛。其脉當沈若弦。反洪大。故有虻蟲。

虻蟲之爲病。令人吐涎。心痛發作有時。毒藥不止。甘草粉蜜湯主之。

●甘草粉蜜湯方。

甘草二兩。粉一兩重。蜜四兩。

右三味。以水三升。先煮甘草取二升。去滓。內紛蜜。攪令和。煎如薄粥。溫服一升。差即止。

虻厥者。當吐虻。令病者靜而復時煩。此爲藏寒虻上入膈。故煩。須臾復止。得食而嘔。又煩者。虻聞食臭出。其人當自吐虻。

虻厥者。烏梅丸主之。

●烏梅丸方。

烏梅三百箇。細辛六兩。乾薑十兩。黃連一斤。

當歸四兩。附子六兩。炮。川椒四兩。去汗。桂枝六兩。

人參。黃蘗各六兩。

右十味。異搗篩。合治之。以苦酒漬烏梅一宿。去核。蒸之五升米下。飯熟。擣成泥。和藥令相得。內臼中。與蜜杵二千下。丸如梧子大。先食飲服十丸。日三服。稍加至二十丸。

禁生冷滑臭等食。

◆婦人妊娠病脉證并治第二十。

師曰。婦人得平脉。陰脉小弱。其人渴不能食。無寒熱。名妊娠。桂枝湯主之。於法六十日。當有此證。設有醫治逆者。却一月加吐下者則絕之。

婦人宿有癥病。經斷未及三月。而得漏下不止。胎動在臍上者。

爲癥瘕害妊娠。六月動者。前三月經水利時胎。下血者。後斷三月衄也。所以血不止者。其癥不去故也。當下其癥。桂枝茯苓丸主之。

●桂枝茯苓丸方。

桂枝。茯苓。牡丹去心。

桃仁去皮尖。熬。芍藥各等分。

右五味。末之。煉蜜和丸如兔屎大。每日食前服一丸。不知加至三丸。

婦人懷娠六七月。脉弦發熱。其胎愈脹。腹痛惡寒者。少腹如扇。所以然者。子藏開故也。當以附子湯溫其藏。

師曰。婦人有漏下者。有半產後。因續下血都不絕者。有妊娠下血者。假令妊娠腹中痛。爲胞阻。膠艾湯主之。

●芎歸膠艾湯方。

芎藭。阿膠。甘草各二兩。艾葉。

當歸各三兩。芍藥四兩。乾地黄。

右七味。以水五升。清酒三升。合煮取三升。去滓。內膠令消盡。溫服一升。日三服。不差更作。

婦人懷妊。腹中豈痛。當歸芍藥散主之。

●當歸芍藥散方。

當歸三兩。芍藥一斤。茯苓四兩。

白朮四兩。澤瀉半斤。芎藭半斤。一作三兩。

右六味。杵爲散。取方寸匕。酒和。日三服。

妊娠嘔吐不止。乾薑人參半夏丸主之。

●乾薑人參半夏丸方。

乾薑。人參各一兩。半夏二兩。

右三味。末之。以生薑汁糊爲丸。如梧子大。飲服十丸。日三服。

妊娠小便難。飲食如故。歸母苦參丸主之。

●當歸貝母苦參丸方。

當歸。貝母。苦參各四兩。

右三味。末之。煉蜜丸如小豆大。飲服三丸。加至十丸。

妊娠有水氣。身重。小便不利。洒淅惡寒。起即頭眩。葵子茯苓散主之。

●葵子茯苓散方。

葵子一斤。茯苓三兩。

右二味。杵爲散。飲服方寸匕。日三服。小便利則愈。

婦人妊娠。宜常服。當歸散主之。

●當歸散方。

當歸。黃芩。芍藥。

芎藭各一斤。白朮半斤。

右五味。杵爲散。酒飲服方寸匕。日再服。妊娠常服即易產。胎無苦疾。產後百病悉主之。

妊娠養胎。白朮散主之。

●白朮散方。

白朮。芎藭。蜀椒三分。去汗。牡蠣。

右四味。杵爲散。酒服一錢匕。日三服。夜一服。但苦痛。加芍藥。心下毒痛。倍加芎藭。心煩吐痛。不能食飲。加細辛一兩。半夏大者二十枚。服之後。更以醋漿水服之。若嘔以醋漿水服之。復不解者。小麥汁服之。已後渴者。大麥粥服之。病雖愈。服之勿置。

婦人傷胎懷身。腹滿。不得小便。從腰以下。重如有水氣狀。懷身七月。太陰當養不養。此心氣實。當刺瀉勞宮及關元。小便微利則愈。

#### ◆婦人產後病脉證治第二十一。

問曰。新產婦人有三病。一者病瘧。二者病鬱冒。三者大便難。何謂也。師曰。新產血虛。多汗出。喜中風。故令病瘧。亡血復汗。寒多。故令鬱冒。亡津液胃燥。故大便難。

產婦鬱冒。其脉微弱。嘔不能食。大便反堅。但頭汗出。所以然者。血虛而厥。厥而必冒。冒家欲解。必大汗出。以血虛下厥。孤陽上出。故頭汗出。所以產婦喜汗出者。亡陰血虛。陽氣獨盛。故當汗出。陰陽乃復。大便堅。嘔不能食。小柴胡湯主之。

病解能食。七八日更發熱者。此爲胃實。大承氣湯主之。

產後腹中豈痛。當歸生薑羊肉湯主之。并治腹中寒疝。虛勞不足。  
當歸生薑羊肉湯方。

產後腹痛。煩滿不得臥。枳實芍藥散主之。

●枳實芍藥散方。

枳實燒令黑。勿大過。芍藥等分。

右二味。杵爲散。服方寸匕。日三服。并主癰膿。以麥粥下之。

師曰。產婦腹痛。法當以枳實芍藥散。假令不愈者。此爲腹中有乾血著臍下。宜下瘀血湯主之。亦主經水不利。

●下瘀血湯方。

大黃二兩。桃仁二十枚。蟪蟲二十枚。熬。去足。  
右三味。末之。煉蜜和爲四丸。以酒一升。煎一丸。取八合。  
頓服之。新血下如豚肝。

產後七八日。無太陽證。少腹堅痛。此惡露不盡。不大便。煩躁發熱。切脉微實。再倍發熱。日晡時煩躁者不食。食則讖語。至夜即愈。宜大承氣湯主之。熱在裏。結在膀胱也。

產後風。續之數十日不解。頭微痛。惡寒。時時有熱。心下悶。乾嘔汗出。雖久陽旦證續在耳。可與陽旦湯。

產後中風。發熱面正赤。喘而頭痛。竹葉湯主之。

●竹葉湯方。

竹葉一把。葛根三兩。防風一兩。桔梗。  
桂枝。人參。甘草各一兩。附子一枚。炮。  
大棗十五枚。生薑五兩。  
右十味。以水一斗。煮取二升半。分溫三服。溫覆使汗出。  
頸項強。用大附子一枚。破之如豆大。煎藥揚去沫。嘔者。加半夏半升洗。

婦人乳。中虛。煩亂嘔逆。安中益氣。竹皮大丸主之。

●竹皮大丸方。

生竹茹二分。石膏二分。桂枝一分。甘草七分。  
白薇一分。  
右五味。末之。棗肉和丸彈子大。以飲服一丸。日三。夜二服。有熱者。倍白薇。煩喘者。加栝實一分。

產後下利虛極。白頭翁加甘草阿膠湯主之。

●白頭翁加甘草阿膠湯方。

白頭翁二兩。黃連。藥皮。  
秦皮各三兩。甘草二兩。阿膠二兩。  
右六味。以水七升。煮取二升半。內膠令消盡。分溫三服。

附方。

▲千金。●三物黃芩湯。治婦人在草蓐。自發露得風。四肢苦煩熱。頭痛者。與小柴胡湯。頭不痛。但煩者。此湯主之。

黃芩一兩。苦參二兩。乾地黄四兩。  
右三味。以水八升。煮取二升。溫服一升。多吐下蟲。

▲千金。●內補當歸建中湯。治婦人產後。虛羸不足。腹中刺痛不止。吸吸少氣。或苦少腹中急摩痛。引腰背。不能食飲。產後一月。日得服四五劑爲善。令人強壯宜。

當歸四兩。桂枝三兩。芍藥六兩。  
生薑三兩。甘草二兩。大棗十二枚。

右六味。以水一斗。煮取三升。分温三服。一日令盡。若大虛。加飴糖六兩。湯成內之。於火上媛令飴消。若去血過多。崩傷內衄不止。加地黃六兩。阿膠二兩。合八味。湯成內阿膠。若無當歸。以芎藭代之。若無生薑。以乾薑代之。

◆婦人雜病脉證并治第二十二。

婦人中風七八日。續來寒熱。發作有時。經水適斷。此爲熱入血室。其血必結。故使如瘧狀。發作有時。小柴胡湯主之。

婦人傷寒發熱。經水適來。晝日明了。暮則讖語。如見鬼狀者。此爲熱入血室。治之無犯胃氣及上二焦。必自愈。

婦人中風。發熱惡寒。經水適來。得七八日。熱除脉遲。身涼和。胸脇滿。如結胸狀。讖語者。此爲熱入血室也。當刺期門。隨其實而取之。

陽明病。下血讖語者。此爲熱入血室。但頭汗出。當刺期門。隨其實而瀉之。澱然汗出者愈。

婦人咽中如有炙臠。半夏厚朴湯主之。

●半夏厚朴湯方。

半夏一升。厚朴三兩。茯苓四兩。

生薑五兩。乾蘇葉二兩。

右五味。以水七升。煮取四升。分温四服。日三。夜一服。

婦人藏躁。喜悲傷欲哭。象如神靈所作。數欠伸。甘麥大棗湯主之。

●甘草小麥大棗湯方。

甘草三兩。小麥一升。大棗十枚。

右三味。以水六升。煮取三升。温分三服。亦補脾氣。

婦人吐涎沫。醫反下之。心下即痞。當先治其吐涎沫。小青龍湯主之。涎沫止。乃治痞。瀉心湯主之。

●小青龍湯方。

●瀉心湯方。

婦人之病。因虛積冷結氣。爲諸經水斷絕。至有歷年。血寒積結。胞門。寒傷經絡。凝堅在上。嘔吐涎唾。久成肺癰。形體損分。在中盤結。繞臍寒疝。或兩脇疼痛。與藏相連。或結熱中。痛在關元。脉數無瘡。肌若魚鱗。時著男子。非止女身。在下未多。經候不勻。冷陰掣痛。少腹惡寒。或引腰脊。下根氣街。氣衝急痛。膝脛疼煩。奄忽眩冒。狀如厥癰。或有憂慘。悲傷多嗔。此皆帶下。非有鬼神。久則羸瘦。脉虛多寒。

三十六病，千變萬端。審脉陰陽，虛實緊弦，行其鍼藥，治危得安。其雖同病，脉各異源，子當辯記，勿謂不然。

問曰：婦人年五十所，病下利，數十日不止，暮即發熱，少腹裏急，腹滿，手掌煩熱，脣口乾燥，何也。

師曰：此病屬帶下，何以故？曾經半產，瘀血在少腹不去，何以知之？其證脣口乾燥，故知之。當以溫經湯主之。

●溫經湯方。

吳茱萸三兩，當歸，芍藥，芎藭各二兩。

人參，桂枝，阿膠，牡丹去心生薑，甘草各二兩，半夏半升，麥門冬一升，去心。

右十二味，以水一斗，煮取三升，分溫三服。

亦主婦人少腹寒，久不受胎，兼取崩中去血，或月水來過多，及至期不來。

帶下，經水不利，少腹滿痛，經一月再見者，土瓜根散主之。

●土瓜根散方。

土瓜根，芍藥，桂枝，蟪蟲各三分。

右四味，杵爲散，酒服方寸匕，日三服。

寸口脉弦而大，弦則爲減，大則爲芤，減則爲寒，芤則爲虛，寒虛相搏，此名曰革，婦人則半產漏下，旋覆花湯主之。

●旋覆花湯方。

旋覆花三兩，葱十四莖，新絳少許。

右三味，以水三升，煮取一升，頓服之。

婦人陷經漏下，黑不解，膠薑湯主之。

婦人少腹滿如敦狀，小便微難而不渴，生後者，此爲水與血俱結在血室也，大黃甘遂湯主之。

●大黃甘遂湯方。

大黃四兩，甘遂二兩，阿膠二兩。

右三味，以水三升，煮取一升，頓服之，其血當下。

婦人經水不利下，抵當湯主之。

●抵當湯方。

水蛭三十箇，熬，蟲蟲三十枚，熬，去翅足。

桃仁二十箇，去皮尖，大黃三兩，酒浸。

右四味，爲末，以水五升，煮取三升，去滓，溫服一升。

婦人經水閉不利，藏堅癖不止，中有乾血，下白物，礬石丸主之。

●礬石丸方。

礬石三分，燒，杏仁一分。

右二味，末之，煉蜜和丸棗核大，內藏中，劇者再內之。

婦人六十二種風。及腹中血氣刺痛。紅藍花酒主之。

●紅藍花酒方。

紅藍花一兩。

右一味。以酒一大升。煎減半。頓服一半。未止再服。

婦人腹中諸疾痛。當歸芍藥散主之。

●當歸芍藥散方。

婦人腹中痛。小建中湯主之。

●小建中湯方。

問曰。婦人病飲食如故。煩熱不得臥。而反倚息者何也。

師曰。此名轉胞。不得溺也。以胞系了戾。故致此病。但利小便則愈。宜腎氣丸主之。

●腎氣丸方。

乾地黄八兩。薯蕷四兩。山茱萸四兩。澤瀉三兩。

茯苓三兩。牡丹皮三兩。桂枝。附子炮。各一兩。

右八味。末之。煉蜜和丸梧子大。酒下十五丸。加至二十五丸。日再服。

●蛇床子散方。溫陰中坐藥。

蛇床子仁。

右一味。末之。以白粉少許。和令相得。如棗大。綿裹內之。自然溫。

少陰脉滑而數者。陰中即生瘡。陰中蝕瘡爛者。狼牙湯洗之。

●狼牙湯方。

狼牙三兩。右一味。以水四升。煮取半升。以綿纏筋如繭。浸湯瀝陰中。日四遍。

胃氣下泄。陰吹而正喧。此穀氣之實也。膏髮煎導之。

●膏髮煎方。

●小兒疳蟲蝕齒方。雄黃。葶藶。右二味。末之。取臘月豬脂鎔※。以槐枝綿裹頭四五枚。點藥烙之。

◆雜療方第二十三。

退五藏虛熱。●四時加減柴胡飲子方。

冬三月加柴胡八分。白朮八分。大腹檳榔四枚。并皮子用。陳皮五分。生薑五分。桔梗七分。

春三月加枳實減。白朮共六味。

夏三月加生薑三分。枳實五分。甘草三分。共八味。

秋三月加陳皮三分。共六味。

右各竅咀，分爲三貼，一貼以水三升，煮取二升，分溫三服，如人行四五里進一服，如四體雍，添甘草少許，每貼分作三小貼，每小貼，以水一升，煮取七合，溫服，再合滓爲一服，重煮，都成四服。

●長服訶梨勒丸方。

訶梨勒煨，陳皮，厚朴各三兩，右三味，末之，煉蜜丸如梧子大，酒飲服二十丸，加至三十九。

●三物備急丸方。

大黃一兩，乾薑一兩，巴豆一兩，去皮心熬，外研如脂。

右藥各須精新，先擣大黃乾薑爲末，研巴豆內中，合治一千杵，用爲散，蜜和丸亦佳，密器中貯之，莫令歇，主心腹諸卒暴百病，若中惡客忤，心腹脹滿，卒痛如錐刺，氣急口噤，停尸卒死者，以煖水若酒※，服大豆許三四丸，或不下，捧頭起，灌令下咽，須臾當差，如未差，更與三丸，當腹中鳴，即吐下便差，若口噤，亦須折齒灌之。

治傷寒令愈不復，紫石寒食散方。

●紫石寒食散方※。

紫石英，白石英，赤石脂，鍾乳碓鍊，括蕪根，防風，桔梗，文蛤，鬼臼各十分，太一餘糧十分，燒，乾薑，附子炮，去皮，桂枝去皮，各四分，右十三味，杵爲散，酒服方寸匕。

●救卒死方。

薤搗汁，灌鼻中。

又方，雄雞冠割取血，管吹內鼻中。

猪脂如雞子大，苦酒一升，煮沸，灌喉中。

雞肝及血，塗面上，以灰圍四旁，立起。

大豆二七粒，以雞子白并酒和，盡以吞之。

●救卒死而壯熱者方。

礬石半斤，以水一斗半，煮消，以漬脚，令沒踝。

●救卒死而目閉者方。

騎牛臨面，搗薤汁灌耳中，吹皂莢末鼻中，立效。

●救卒死而張口反折者方。

灸手足兩爪後，十四壯了，飲以五毒諸膏散。

●救卒死而四肢不收，失便者方。

馬屎一升，水三斗，煮取二斗，以洗之，又取牛洞一升，溫酒灌口中，灸心下一寸，臍上三寸，臍下四寸，各一百壯，差。

●救小兒卒死而吐利，不知是何病方。

狗屎一丸，絞取汁以灌之，無濕者，水煮乾者取汁。



●尸蹶。脉動而無氣。氣閉不通。故靜而死也。治方。  
菖蒲屑。內鼻兩孔中吹之。令人以桂屑著舌下。  
又方。剔取左角髮方寸。燒末。酒和。灌令入喉。立起。

●救卒死客忤死。還魂湯主之。方。  
麻黃三兩。去節。一方四兩。杏仁去皮尖。七十箇。  
甘草一兩。炙。千金。用桂心二兩。  
右三味。以水八升。煮取三升。去滓。分令咽之。通治諸感忤。  
又方。  
蕤根一把。烏梅二十箇。吳茱萸半升。炒。  
右三味。以水一斗。煮之。以病人櫛內中三沸。櫛浮者生。  
沈者死。煮取三升。去滓。分飲之。

●救自縊死。旦至暮。雖已冷。必可治。暮至旦。少難也。恐此當言陰氣盛故也。然夏時夜短於晝。又熱。猶應可治。又云。心下若微溫者。一日以上。猶可治之。方。  
徐徐抱解。不得截繩。上下安被臥之。一人以脚踏其兩肩。手少挽其髮。常弦弦勿縱之。一人以手按據胸上。數動之。一人摩揅臂脛。屈伸之。若已殭。但漸漸強屈之。并按其腹。如此一炊頃。氣從口出。呼吸眼開。而猶引按莫置。亦勿苦勞之。須臾可少桂湯及粥清含與之。令濡喉。漸漸能嚙。及稍止。若向令兩人以管吹其兩耳。窅好。此法最善。無不活也。

●凡中暈死。不可使得冷。得冷便死。療之方。  
屈草帶。繞暈人臍。使三兩人溺其中。令溫。亦可用熱泥和屈草。亦可扣瓦椀底按。及車缸。以著暈人。取令溺。須得流去。此謂道路窮卒無湯。當令溺。其中。欲使多人溺。取令溫。若湯便可與之。不可泥及車缸。恐此物冷。暈既在夏月。得熱泥土暖車缸。亦可用也。

●救溺死方。  
取竈中灰兩石餘。以埋人。從頭至足。水出七孔。即活。  
右療自縊溺暈之法。並出自張仲景爲之。其意殊絕。殆非常情所及。本草所能關。實救人之大術矣。傷寒家數有暈病。非此遇熱之暈。

●治馬墜。及一切筋骨損方。  
大黃一兩。切。浸。湯成下。緋帛如手大。燒灰。  
亂髮如雞子大。燒灰用。  
久用炊單布一尺。燒灰。敗蒲一握。三寸。桃仁四十九箇。去皮尖。熬※。  
甘草如中指節。炙剉。  
右七味。以童子小便量多少。煎湯成。內酒一大盞。次下大黃。去滓。分溫三服。先剉敗蒲席半領。煎湯浴。衣被覆。復斯須通利數行。痛楚立差。利及浴水赤。勿怪。則瘀血也。

◆禽獸魚蟲禁忌并治第二十四。

凡飲食滋味，以養於生，食之有妨，反能爲害，自非服藥煉液，焉能不飲食乎。  
切見時人，不閑調攝，疾疢競起，若不因食而生，苟全其生，須知切忌者矣。  
所食之味，有與病相宜，有與身爲害，若得宜則益體，害則成疾，以此致危，例皆難療。  
凡煮藥飲汁，以解毒者，雖云救急，不可熱飲，諸毒病得熱更甚，宜冷飲之。

肝病禁辛，心病禁鹹，脾病禁酸，肺病禁苦，腎病禁甘，春不食肝，夏不食心，秋不食肺，冬不食腎，四季不食脾，辯曰，春不食肝者，爲肝氣王，脾氣敗，若食肝則又補肝，脾氣敗尤甚，不可救，又肝王之時，不可以死氣入肝，恐傷魂也。  
若非王時即虛，以肝補之佳，餘藏準此。

凡肝臟自不可輕噉，自死者彌甚。

凡心皆爲神識所舍，勿食之，使人來生復其報對矣。

凡肉及肝，落地不著塵土者，不可食之。

猪肉落水浮者，不可食。

諸肉及魚，若狗不食，鳥不啄者，不可食。

諸肉不乾，火炙不動，見水自動者，不可食之。

肉中有如朱點者，不可食之。

六畜肉，熱血不斷者，不可食之。

父母及身本命肉，食之令人神魂不安。

食肥肉及熱羹，不得飲冷水。

諸五藏及魚，投地塵土不污者，不可食之。

穢飯餒肉臭魚，食之皆傷人。

自死肉口閉者，不可食之。

六畜自死皆疫死，則有毒，不可食之。

獸自死北首，及伏地者，食之殺人。

食生肉，飽飲乳，變成白蟲。

疫死牛肉。食之令病洞下。亦致堅積。宜利藥下之。

脯藏米甕中有毒。及經夏食之。發腎病。

●治自死六畜肉中毒方。黃蘗屑搗。服方寸匕。

●治食鬱肉漏脯。中毒方。

燒犬屎。酒服方寸匕。每服人乳汁。亦良。飲生薑汁三升。亦得。

●治黍米中藏乾脯。食之中毒方。大豆濃煮汁。飲數升。即解。亦治狸肉漏脯等毒。

●治食生肉中毒方。掘地深三尺。取其下土三升。以水五升。煮數沸。澄清汁。飲一升。即愈。

●治六畜鳥獸肝中毒方。水浸豆豉。絞取汁。服數升愈。

馬脚無夜眼者。不可食之。

食酸馬肉。不飲酒則殺人。

馬肉不可熟食。傷人心。

馬鞍下肉。食之殺人。

白馬黑頭者。不可食之。

白馬青蹄者。不可食之。

馬肉糞肉共食飽。醉臥。大忌。

驢馬肉合猪肉食之。成霍亂。

馬肝及毛。不可妄食。中毒害人。

●治馬肝毒。中人未死方。雄鼠屎二七粒。末之。水和服。日再服。  
又方。人垢取方寸匕。服之佳。

●治食馬肉。中毒欲死方。

香豉二兩。杏仁三兩。

右二味。蒸一食頃。熟杵之服。日再服。

又方。煮蘆根汁飲之。良。

疫死牛。或目赤。或黃。食之大忌。

牛肉共猪肉食之。必作寸白蟲。

青牛腸不可合犬肉食之。

牛肺從三月至五月。其中有蟲如馬尾。割去勿食。食則損人。

牛羊猪肉。皆不得以楮木桑木蒸炙食之。令人腹内生蟲。

噉蛇牛肉殺人。何以知之。噉蛇者。毛髮向後順者是也。

●治噉蛇牛肉。食之欲死方。飲人乳汁一升。立愈。

又方。以泔洗頭。飲一升。愈。

牛肚細切。以水一斗。煮取一升。煖飲之。大汗出者愈。

●治食牛肉中毒方。甘草煮汁。飲之即解。

羊肉。其有宿熱者。不可食之。

羊肉不可共生魚酪食之。害人。

羊蹄甲中。有珠子白者。名羊懸筋。食之令人癲。

白羊黑頭。食其腦。作腸癰。

羊肝共生椒食之。破人五藏。

猪肉共羊肝和食之。令人心悶。

猪肉以生葫荑同食。爛人臍。

猪脂不可合梅子食之。猪肉和葵食之。少氣。

鹿人不可和蒲白作羹食之。發惡瘡。

麋脂及梅李子。若妊婦食之。令子青盲。男子傷精。

驢肉不可合蝦及生菜梅李果食之。皆病人。

痼疾人。不可食熊肉。令終身不愈。

白犬自死不出舌者。食之害人。

食狗鼠餘。令人發癩瘡。

●治食犬肉不消。心下堅。或腹脹口乾大渴。心急發熱。妄語如狂。或洞下方。杏仁一升。合皮。熟研用。以沸湯三升。和取汁。分三服。利下肉片。大驗。

婦人妊娠。不可食兔肉山羊肉。及鶩雞鴨。令子無聲音。

兔肉不可合白雞肉食之。令人面發黃。

兔肉著乾薑食之。成霍亂。

凡鳥自死。口不閉。翅不合者。不可食之。

諸禽肉肝青者。食之殺人。

雞有六翮四距者。不可食之。

烏雞白首者。不可食之。

雞不可共葫蒜食之。滯氣。

山雞不可合鳥獸肉食之。

雉肉久食之。令人瘦。

鴨卵不可合鶩肉食之。

婦人妊娠。食雀肉。令子淫亂無恥。

雀肉不可合李子食之。

燕肉勿食。入水爲蛟龍所噉。

●鳥獸有中毒箭死者。其肉有毒。解之方。大豆煮汁。及鹽汁。服之解。

魚頭正白。如連珠。至脊上。食之殺人。

魚頭中無腮者。不可食之。殺人。

魚無腸膽者。不可食之。三年陰不起。女子絕生。

魚頭似有角者。不可食之。

魚目合者。不可食之。

六甲日。勿食鱗甲之物。

魚不可合雞肉食之。

魚不得合鸕鷀肉食之。

鯉魚鮓不可合小豆菹食之。其子不可合猪肝食之。害人。

鯉魚不可合犬肉食之。

鯽魚不可合猴雉肉食之。一云。不可合猪肝食。

鯢魚合鹿肉生食。令人筋甲縮。

青魚鮓。不可合生胡荽。及生葵并麥中食之。

鱸鱖不可合白犬血食之。

龜肉不可合酒果子食之。

鱉目凹陷者。及厭下有王字形者。不可食之。

其肉不得合雞鴨子食之。

龜鱉肉不可合莧菜食之。

鰕無須。及腹下通黑。煮之反白者。不可食之。

食膾。飲乳酪。令人腹中生蟲爲瘕。

●鱸食之。在心胸間不化。吐復不出。遠下除之。久成癥病。治之方。

橘皮一兩。大黃二兩。朴消二兩。

右三味。以水一大升。煮至小升。頓服即消。

●食鱸多不消。結爲癥病。治之方。

馬鞭草右一味。搗汁飲之。或以薑葉汁。飲之一升。亦消。又可服吐藥吐之。

●食魚後食毒。兩種煩亂。治之方。

橘皮。

濃煎汁。服之即解。

●食鯪鯪魚。中毒方。

蘆根。

煮汁服之。即解。

蟹目相向。足斑目赤者。不可食之。

●食蟹中毒。治之方。

紫蘇。

煮汁。飲之三升。紫蘇子搗汁。飲之。亦良。

又方。

冬瓜汁。飲二升。食冬瓜亦可。

凡蟹未遇霜多毒。其熟者。乃可食之。

蜘蛛落食中有毒。勿食之。

凡蜂蠅蟲蟻等。多集食上。食之致癯。

◆果實菜穀禁忌并治第二十五。

果子生食。生瘡。

果子落地經宿。蟲蟻食之者。人大忌食之。

生米停留多日。有損處。食之傷人。

桃子多食。令人熱。仍不得入水浴。令人病淋瀝寒熱病。

杏酪不熟。傷人。

梅多食。壞人齒。

李不可多食。令人臃脹。

林檎不可多食。令人百脉弱。

橘柚多食。令人口爽。不知五味。

梨不可多食。令人寒中。金瘡產婦。亦不宜食。

櫻桃杏多食。傷筋骨。

安石榴不可多食。損人肺。

胡桃不可多食。令人動痰飲。

生棗多食。令人熱渴氣脹寒熱。羸瘦者。彌不可食。傷人。

●食諸果中毒。治之方。

猪骨燒過。

右一味。末之。水服方寸匕。亦治馬肝漏脯等毒。

木耳赤色。及仰生者。勿食。菌仰卷。及赤色者。不可食。

●食諸菌中毒。悶亂欲死。治之方。

人糞汁。飲一升。土漿。飲一二升。

大豆濃煮汁飲之。服諸吐利藥。並解。

食楓樹菌※。而笑不止※。治之以前方。

誤食野芋。煩毒欲死。治之方。以前方。

●蜀椒閉口者有毒。誤食之。毒入咽喉。氣病欲絕。或吐下白沫。身體痺冷。急治之方。

肉桂煎汁飲之。多飲冷水一二升。

或食蒜。或飲地漿。或濃煮豉汁飲之。並解。

正月勿食生葱。令人面生游風。

二月勿食蓼。傷人腎。

三月勿食小蒜。傷人志性。

四月八月。勿食胡荽。傷人神。



五月勿食韭。令人乏氣力。五月五日。勿食一切生菜。發百病。

六月七月。勿食茱萸。傷神氣。

八月九月。勿食薑。傷人神。

十月。勿食椒。損人心。傷心脉。

十一月十二月。勿食薤。令人多涕唾。

四季勿食生葵。令人飲食不化。發百病。非但食中。藥中皆不可用。深宜慎之。時病差未健。食生菜。手足必腫。

夜食生菜。不利人。

十月。勿食被霜生菜。令人面無光。目澀心痛腰疼。或發心瘡。瘡發時。手足十指爪皆青。困委。

葱韭初生芽者。食之傷人心氣。

飲白酒。食生韭。令人病增。

生葱不可共蜜食之。殺人。獨顆蒜彌忌。

棗合生葱食之。令人病。

生葱和雄雞雉白犬肉食之。令人七竅經年流血。

食糖蜜後。四日內食生葱蒜。令人心痛。

夜食諸薑蒜葱等。傷人心。

蕪菁根多食。令人氣脹。

薤不可共牛肉作羹食之。成瘕病。韭亦然。

蓴多食※。動痔疾。

野苣不可同蜜食之。作內痔。

白苣不可共酪同食。作蟄蟲。

黃瓜食之。發熱病。

葵心不可食。傷人。葉尤冷。黃背赤莖者。勿食之。

胡荽久食之。令人多忘。

病人不可食胡荽及黃花菜。

芋不可多食。動病。

妊婦食薑。令子餘指。

蓼多食。發心痛。

蓼和生魚食之。令人奪氣。陰核疼痛※。

芥菜不可共兔肉食之。成惡邪病。

小蒜多食。傷人心力。

●食躁或躁方※。

豉。

濃煮汁飲之。

●鉤吻與芹菜相似。誤食之殺人。解之方。

薺芎八兩。

右一味。水六升。煮取二升。分溫二服。

●菜中有水菘蓇。葉圓而光。有毒。誤食之。令人狂亂。狀如中風。

或吐血。治之方。

甘草。

煮汁服之即解。

●春秋二時。龍帶精入芹菜中。人偶食之爲病。發時手青。腹滿痛不可忍。名蛟龍病。治之方。

硬糖二三升。

右一味。日兩度服之。吐出如蜥蜴三五枚。差。

●食苦瓠中毒。治之方。

黍穰。

煮汁。數服之解。

扁豆寒熱者不可食之。

久食小豆。令人枯燥。

食大豆屑。忌噉猪肉。

大麥久食。令人作愛。

白黍米不可同飴蜜食。亦不可合葵食之。

苽麥麩多食之。令人髮落。

鹽多食。傷人肺。

食冷物。冰人齒。

食熱物。勿飲冷水。

飲酒食生蒼耳。令人心痛。

夏月大醉汗流。不得冷水洗著身。及使扇。即成病。

飲酒。大忌炙腹背。令人腸結。

醉後勿飽食。發寒熱。

飲酒食猪肉。臥秫稻穰中則發黃。

食飴多飲酒。大忌。

凡水及酒。照見人影動者。不可飲之。

醋合酪食之。令人血瘕。

食白米粥。勿食生蒼耳。成走疰。

食甜粥已。食鹽即吐。

犀角筋攪飲食沫出。及澆地墳起者。食之殺人。

●飲食中毒煩滿。治之方。

苦參三兩。苦酒一升半。

右二味。煮三沸。三上三下。服之吐食出。則差。或以水煮亦得。

又方。犀角湯亦佳。

●貪食。食多不消。心腹堅滿痛。治之方。

鹽一升。水三升。

右二味。煮令鹽消。分三服。當吐出食。便差。

礬石生入腹破人心肝亦禁水。

商陸以水服殺人。

葶藶子。傅頭瘡。藥成入腦殺人。

水銀入人耳。及六畜等。皆死。以金銀著耳邊。水銀則吐。

苦練無子者。殺人。

凡諸毒多是假毒以投。無知時※。宜煮甘草薺苳汁飲之。通除諸毒藥。